

Primera carta de San Pablo a los Corintios

Corinto cuto gånare Pablo ĩ papera cõare gaye

¹ Ñati Corinto cuto gãna mua. Yũ ña Pablo. Sóstenes mani yagu rãca, “Quenajaro”, ya gũa. Dios ĩ ãmoro bajiroti Jesucristo ocare yũ riaso ucutoni yũre cũni ĩ. ² Mua Corinto cuto gãna cuni Dios ñarã ña mua. Ito bajiri adi papera cõa yũ muare. Jesucristore tuorũnurã ñari Dios ñarã ña mua. Dios muare beseñi ñeñarise yimenati mua ñatoni. No mani Ɖju Jesucristore tuorũnurãti ito bajiroti ĩna ñare ãmoguĩji Dios. Mani Ɖju ñami Jesucristo. No ĩre tuorũnurãre ĩna Ɖju ñami Jesucristo. ³ Mani Jacu Dios, ito yicõri mani Ɖju Jesucristore cuni seni ĩsia yũ muare yari. Muare ĩna queno yijaro yirocu ĩnare senia yũ. Mua ya usiju queno mua wanu quenatoni muare yari ĩnare senia yũ.

Cristore tuorũnurãre Dios ĩ queno yire gaye

⁴ Jesucristo ĩ goda ĩsirajuna suoriti queno yami Dios muare. Ito bajiro ĩ yijare, “Queno ya Dios mu”, yisotia yũ ĩre. ⁵ Cristore tuorũnurã mua ñajare queno muare ejabuami Dios. ĩ gayere queno mua tuo rẽtobutoni ito bajiro yami Dios. Ito bajiri mua busirise, mua masirise cuni queno mua masi rẽta budiroca yami ĩ. ⁶ “Jesucristore mua tuorũnũja, mama usi muare wasoagu yiguĩji ĩ”, yũ yiado bajiroti baja muare. ⁷ Ito bajiri Jesucristo mani Ɖju ĩ ejari rumu mani bocatiroca queno yi ñagũ yiguĩji Dios manire. Ito bajiro manire queno ĩ yijare ñejuu ruyabeto yiroja manire, ĩre mani moa ĩsi masitoni. ⁸ Macãrucũro iti jediroto riojua Jesucristore mani tuorũnu jidicãbititoni manire ejabuagu yiguĩji Dios. Ito bajiri Jesucristo mani

Ѓју ĩ tũdi ejari rumu, “Seti cutirã ñama ĩna”, sĭgũjuu yi masimena yirãji ĩna manire. ⁹“Ado bajiro yigu yigũja yu”, ĩ yiado bajiroti yigu yiguĭji Dios. Dios ĩti ñami manire beseru. ĩ Macu Jesucristo mani Ѓју rãca sĭgũre bajiro mani queno ñatoni manire beseñi Dios.

Corinto cuto gãna ricati riti ĩna tuoĩare gaye

¹⁰ Tuoya yu ñarã mua. Muare yu gotitoni yure cũñi mani Ѓју Jesucristo. ĩre tuorũnurã ña mua. Ito bajiri sĭgũre bajiro mua tuoĩaja quena. Ricati riti tuoĩabesa mua. Ado bajirojuu mua yija quena. Sĭgũre bajiro tuoĩacõri oca manoti queno mua ñaja quena. ¹¹ “Ricati riti tuoĩama ĩna”, Cloé mesa ĩna yija tuocõri, iti muare busia, yu ñarã yu. ¹² Ado bajiro yure goticã Cloé mesa: “Ricati riti tuoĩama Corinto cuto gãna. Tite mu. ‘Pablöre tuo suyarã ña guama’, yama gãjerã. ‘Apolosre tuo suyarã ña guama’, yama gãjerã. ‘Pedrore tuo suyarã ña guama’, yama gãjerã. ‘Cristore tuo suyarã ña guama’, yama gãjerã”, yi goticã Cloé mesa yure. ¹³ Ricati riti masa ĩna tuoĩaroca yigu meje ñami Cristo. Muare yiari yucutẽoju goda ĩsibiticu yu. Yure tuorũnucõri meje idé gu rotiyija mua. Cristojũare tuorũnucõri idé gu rotiyija mua. ¹⁴⁻¹⁵ Mua wato gãnare jãjarã meje idé gucu yu. Crispore ito yicõri Gayore ĩna jãarãreti idé gucu yu. Ito bajiri, “Pablöre tuorũnucõri idé gu roticu gua”, yi tuoĩamenaji mua. Mua jãjarãre idé gubitigoru ñari, “Queno ya Dios mu”, yi tuoĩa yu. ¹⁶ Baũ, gãjerã Estéfanas ñarãre idé gucu yu. “Iti cuto gãna gãjerãre idé gucu yu”, yi masibea yu. ¹⁷ Masare yu idé gutoni meje yure cũñi Cristo. “Masare masogũ yiguĭji Cristo”, yire oca yu gotitoni yure cũñi ĩ. Buto masirena masa ĩna tuo seyotoni busibea yu. Buto tuo seyore oca yu busija, yũjuare tuorũnucõri Cristore tuorũnubitiboana masa. “Masare yiari yucutẽoju godaņi Cristo”, yi yu masare gotija, iti ña ñasarise.

Dios ï masirise rucogũ ñami Cristo, yire gaye

¹⁸ Adi oca iti gotija, “Manire masorocũ yucutẽojũ godaņi Cristo”, ya iti oca. “Bũroti bajaia iti, mecũre oca ña iti”, yama jeame ãjũrojũ warona. Mani Dios ï masoanareama oca wanũ quenare gaye ña. Sẽorise ña Dios oca. Ito bajiri ï oca tuorũnũcõri, “Cristo ï godarena suoriti manire masogũ yiguĩji”, yi tuoĩa mani. ¹⁹ Dios oca tuti iti gotija ado bajiro gotia:

“Adi sita gãna ñna masirise bũto masire gaye meje ña”, masa ñna yiroca yigũ yigũja yũ. “Queno masirã ña gũa”, yibojarãre, “Queno masirã meje ñama ñna”, gãjerã ñna yi ti masiroca yigũ yigũja yũ, yi gotiami Dios ï oca tutina.

²⁰ “Queno masirã ña gũa”, yama coriarã adi sita gãna. “Queno riaso masia gũa”, yama gãjerã. “Adi macãrucũro gayere queno tuoĩa bũsi masia gũa”, yama gãjerã. Ito bajiro ñna yibojarocati, “Queno masirã meje ñama ñna”, gãjerã masa ñna yi ti masiroca yigũ ñami Dios. ²¹ Jeyaro ñejua ruyabeto tuo masi jeogũ ñami Dios. Adi sita gãna ñna tuo masirena meje ïre masire ãmoņi Dios. ï ocare tuorũnũrena suoriti ïre masire ãmoņi Dios. Ito bajiri ï oca tuorũnũrãre riti masoami Dios. “Ito bajiro masare masoami Dios”, yire oca tuocõri, “Bũroti bajaia, mecũre oca ña”, yama Diore masimena.

²² Tiyamani Dios ï ïore ti ãmoama judio masa. Masa ñna masirisejuare tuo sũya ãmoama griego masa. ²³ “Masare yiari yucutẽojũ godaņi Cristo”, yire oca gotia maniamã. Iti gayere mani gotija tuo ãmobiticõri, junisiniama judio masa. Judio masa meje cũni iti oca tuocõri, “Bũroti bajaia, mecũre oca ña iti”, yama ñna cũni. ²⁴ Maniamã Dios ï beseana ñari Cristore tuorũnũna mani. Mani judio masa, ito yicõri judio masa meje cũni Cristore mani tuorũnũja Dios ï beseana ña mani. Ito bajiri ïre tuorũnũcõri, “Rẽtoro sẽogũ

ñami Dios ito yicōri jeyaro masigũ”, yi tuoïa mani. Ito bajigu ñari jeame ñjuroju mani wabore ñaroca Cristona suoriti manire masogũ yiguïji Dios. ²⁵ “Masare yiarì goda ïsi rotiñi Dios Cristore”, yire oca tuoçōri, “Queno masigũ meje ñami Dios”, yi tuoïama ïre masimena. Ito bajibojarocati Dios ï masirise masa ïna masirise rēto busaro ñasarise ña. “Yucutēojũ godañi Cristo”, yire oca tuoçōri, “Queno sēogũ meje ñañi Dios”, yi tuoïama ïre masimena. Ito bajibojarocati masa ïna sēorise rēto busaro sēogũ ñami Dios. ²⁶ Tũoya yũ ñarã mua. Bũto masirã meje ñabobarãti Dios ï beseana ña mani. Diore masimena ïna tija bũto masirã meje ña mani. Mani wato coriarãti ñama gãjerãre rotiri masa. Mani wato coriarãti ñama ñasari masa rĩa. Bũto ñasarã meje mani ñabobarocati manire beseñi Dios. ²⁷ “Bũto masirã meje ñama ïna”, Diore masimena ïna yianare beseñi Dios. Ito bajiro yiñi Dios, masimenare ï beseja ticōri, “Masirã ña gua”, yirã ïna bojo bujatoni. “Queno sēorã meje ñama”, Diore masimena ïna yianare beseñi Dios. Ito bajiro yiñi Dios, sēomenare ï beseja ticōri, “Sēorã ña gua”, yirã ïna bojo bujatoni. ²⁸ “Ñasarã meje ñama ïna”, Diore masimena ïna yianare beseñi Dios. ïre masimena ïna ti tudianare beseñi Dios. Ito bajiro yiñi Dios, “Ñasarã ña gua”, yirã, “Ñasarã meje ña gua”, ïna yi tuoïa masitoni. ²⁹ Ito bajiro Dios ï yijare, ï tiro riojo, “Ñasagu ña yũ”, yi tuoïa masigũ mami. ³⁰ Cristore mani tuorũnure ãmoñi Dios. Ito bajiri ïre bajiro mani tuoïaroca yiñi Dios manire. Jesucristona suoriti ï oca mani tuo masiroca yiñi Dios. Jesucristona suoriti manire boca ãmicōri mani queno yiroca yiñi Dios. Mani ñeñaro yirisere Cristo ï waja yi ïsicãjare, ñe seti mana ña mani Dios ï tija. ï ñarã ña mani ïja. Cristona suoriti manire masoñi Dios. ³¹ Ito bajiri ï oca tuti iti gotija ado bajiro gotia: “ ‘Ñasarã ña gua’, yi tuoïabiturũja manire. Ado bajirojũa yirũja: ‘Manire

queno yiñi Cristo. Ìjua ñami ñasagu', yi wanu quenaruja manire", yi gotia Dios oca tuti.

2

Yucutëoju godaño Cristo, yire gaye

¹ Tuoja yu ñarã mua. Dios gaye muare goti amogũ, tuo seyore oca rãca meje muare busi ucucu yu. Ito yicõri bato masire ocana meje Dios oca muare goticu yu. ² Mua tu yu ejacati coji gaye ñasarise muare goti amocu yu. "Yucutëoju godaño Cristo masare yiari", yire gaye riti muare goti amocu yu. ³ Ñasagu meje bajiro mua tu ejaçu yu. Mua tiro riojo güigu nũro busicu yu. ⁴ Muare yu busija, yu masirisena meje muare busicu yu. Ito yicõri Dios oca muare yu riasoja, yu masirisena meje muare riasocu yu. Cristore mua tuorũnure amogũ, masa ña masirisena meje muare busicu yu. Ado robojua bajicu: Ì oca muare yu riasoroca ì masirisena mua tuorũnuroca yiñi Espiritu Santo. ⁵ Ito bajiri masa ña masirise tuo seyocõri meje Jesure tuorũnyija mua. Ì ocare mua tuo masiroca yiñi Dios. Ito bajiri ì masirisena suoriti Jesucristore tuorũnyija mua.

Espiritu Santona suoriti Diore masia mani, yire gaye

⁶ Jesucristore rucubucõri queno ìre tuo rëtoburãre yu busija queno masire ocana ñnare busia yu. Ito bajiro yu busija, adi sita gãna ña masirisena meje busia yu. Ito yicõri adi sita gãna ujarã ña masirisena meje busia yu. Adi sita gãna ujarã ñabojana ña masibojare rãcati godarã yirãji ña. ⁷ Yu busija, Dios ì masirisena busia yu. Ito bajiro yu busija, masa ña tuo masiroti gaye ña iti. Adi macãrucũro ì rujeoroto riojua, "Ado bajiro masare masogũ yiguja yu", yi masicãni Dios. Iti oca masa ña masibitire Dios ì masirisena masare riasoa yu. ⁸ Sīgũjua adi sita gãna ujarã itire tuo masirã mama. "Cristona

suoriti masare masogũ yiguĩji Dios”, yi ãna tuo masija, mani Hju ñasagure yucũtẽojũ sãabitiboana ãna. ⁹ Dios oca tuti iti gotiado bajiroti baja. Tũote mua:

Ïre tuo mairãre yiari quenarise queno yucãñi Dios. Masa ãna tiãbiti, ãna tuobiti, ãna tuoãbiti cuni quenarise queno yucãñi Dios, yi gotia Dios oca tuti.

¹⁰ Espiritu Santo manire queo sãcõri, “Quenarise queno yicãñi Dios”, yi mani tuo masiroca yami Dios. Dise ruyabeto masiami Espiritu Santo. Dios ã tuoãrise masi jeoami Espiritu Santo.

¹¹ Mani masamasiti, “Ï ito bajiro tuoãami”, gãmeri yi masibea mani. Ìmasiti, “Ito bajiro tuoãa ya”, yi masiguĩji ã. Ito bajiroti Espiritu Santo sigũti Dios ã masirisere masiguĩji. ¹² Jesucristore tuorũnrã ñari adi sita gãna ãna masirise boca ãmiana meje ña mani. Espiritu Santo Dios ã cõarureama boca ãmiana ña mani. Dios queno manire ã yire gaye mani tuo masitoni Espiritu Santore cõañi Dios manire yiari. ¹³ Ito bajiri mani busija, mani tuoãa rujeorisena meje busia mani. Espiritu Santo manire ã riasorise busia mani. Mani tuoãa rujeorisena meje busia mani. Espiritu Santore boca ãmigoana ñari, gãjerã ãre boca ãmigoanare ã gayere goti rẽtobu masia mani.

¹⁴ Adi sita gãna Espiritu Santore boca ãmimena Dios gayere tuo masimenaji ãna. “Buroti baja, mecure oca ña”, yi tuoãrãji ãna. Ito bajiri itire tuo ãmomenaji ãna. Espiritu Santore boca ãmimena ñari Dios gayere tuo masimenaji ãna. ãna tuo masiroca Espiritu Santo ã yibeja tuo masimenaji ãna. ¹⁵ Espiritu Santore boca ãmianama Dios gayere tuo masirãji ãna. Ito bajiri, “Dios gayere tuo masirã meje ñama ãna”, sigũjua yigu maquĩji ãnare. ¹⁶ Dios oca tuti iti gotija, ado bajiro gotia: “Mani Hju ã tuoãrise masigũ maquĩji. Ñimujua Diore riasogu maquĩji”, yi gotia Dios oca tuti. Ito bajibojarocati Espiritu Santo quedĩ sãja

ecoana mani ñajare, Cristo tuoïarise mani tuo masitoni manire ejabuami ï.

3

Diore mani moa ïsiroti gaye

¹ Тuoуа уа ñarã мaa. Espíritu Santore queno tuorünusamena мaa ñajare, josari gaye муare busibiticu уа maji. Adi sita gãna Espíritu Santore boca ãmimena bajiro josarise gaye meje муare busicu уа. Iti ramuju Cristore boca ãmiana ñabojarãti ïre мaa queno tuo suyabejare, rïacare busigu bajiro муare busicu уа. Queno мaa tuo masibejare rïaca robo bajiro муare busicu уа. ² Josabitire муare riasocu уа. Macuacã ùjugã, òjegõa riti ùjuguïji. Bare butirise ïre ecamenaji. Iti robo bajiroti Cristore мaa tuorünusamena ñajare, josarise gaye муare busibiticu уа maji. Adocãta cuni josarise gaye муare riaso masibea уа maji. ³ Adi sita gãna Jesure boca ãmibitiana bajiro мaa ñajare, josarise gaye муare riasobea уа maji. Gãjerãre ti uorã ña мaa maji. Gãmeri busitua мaa. Ricati riti tuoïa мaa. Diore masimenare bajiro tuoïacõri ïna yiado bajiroti ya мaa maji. ⁴ Maa coriarã ado bajiro ya: “Pablore tuo suyagu ña уаama. Ito yicõri Apolosre tuo suyagu ña уаama”, ya мaa. Ito bajiro мaa yija, adi sita gãna Diore masimena ïna yiado bajiroti ya мaa maji.

⁵ Уа Pablo ñasagu meje ña. Apolos cuni ñasagu meje ñami. Diore moa ïsirã ña гуа. Гуа riasorisere tuorünucõri Cristore tuorünuyija мaa. Гуа Apolos rãca mani Ужу ï moare cüado bajiroti moa гуа. ⁶ Уа муаре cajero riasosnocu. Ito bajiri aje otesuogu robo bajiro baja уа. Уа bero Apolos jai busaro муаре riaso remoñi. ï ñami aje juditoni ide jio gugu bajiro yigu. Dios ñami Cristore мaa masiroca yigu. Ito bajiri гуа otere judiroca yigu bajiro yigu ñami Dios. ⁷ Aje otesuogu, aje ide jio gugu

cuni ñasarã meje ñama ñna. Dios ñami ñasagu. Í ñami iti judi mujaroca yigu. Ito bajiroti í oca riasorã, ito bero gãjerã goti quenorã cuni ñasarã meje ñama ñna. Dios ñami ñasagu. Í ñami Cristore mani masiroca yigu. ⁸ Aje oterã, otere ide jio gurã cuni corocõ moama ñna. Ito bajiroti Dios oca riasorã, ito bero gãjerã goti quenorã corocõti moama ñna. Ñna moado bajiroti ñnare waja yigu yiguíji Dios. ⁹ Gua Apolos rãca sīgũre bajiro tuoĩacõri Diore moa ísirã ña gua. Mua ña sita Dios í coderiju robo bajirã. Gaje Dios í wi menisuori wi robo bajirã ña mua, ñre cudisuorã mua ñajare. ¹⁰ Dios oca muare riasosugũ ñari, wi menirotiju wi godo gosugũ robo bajiro bajigu ña yu. Yure ti maicõri muare í oca yu gotitoni yure cũñi Dios. Gãjerã yu bero riasorã wi godo yu goraju wi menisuorã robo bajirã ñama ñna. Wi queno riojo ñari wi menirã bajiro Dios ocare queno riojo ñna riasoja quena. ¹¹ Wi meniri masa cajero botari ñna ãmi cũbeja menimenaji. Ito bajiroti Dios oca gotiri masa cajero Cristo gaye ñna goti rêtobubeja tuo masimenaji. “Mani ñeñaro yirise waja, waja yi ísirocũ godaño Cristo”, yi muare riasocãcu yu. Iti ña ñasarise. “Ado bajiro Dios ñarã ñarã yirãji masa”, yire gaye oca riojua gaye ñe gaje oca ñasarise gotisũore manoja. ¹² Wi menirotiju gorajure quenari wi menirona gũta queno butirisena, orona, plata wame cutirisena menirãji ñna. Gãjerã buto butiri wi meje ñna menija, yucu jidirisena, muji yoari meje jogarisena, ito yicõri ñicojãi jidirisena menibojarãji ñna. Queno Dios oca riojo riasorã ñna ñama butiri wi bajiro menirã. Riojo ñasarise queno riasomena ñna ñama jidiri wiacã bajiro menirã. ¹³ Masa tiro riojo Dios í beseri rumũ mani moagoado bajiroti waja senigũ yiguíji Dios. Iti rumũ jea ñjurise ejaro yiroja. Mani moagore quesoñaro ejaro yiroja iti. Mani moagore quenarise iti ñaja, uabeto yiroja. Ñeñarise iti ñaja, ua jedicoaro yiroja.

1 CORINTIOS 3:1491 CORINTIOS 3:23

¹⁴ Dios oca queno riojo riasoanare ñna moagore jedibeto yiroja. Gãta wi ñabeto bajiro, ñna moagore jedibeto yiroja. Ito bajiri ñnare waja yigũ yiguĩji Dios. ¹⁵ Dios oca queno riasobitianare ñna moabojare jediro yiroja. Yucu wi iti ña godaro bajiroti jediro yiroja. Ñna ya wi ñaja budigoana robo bajirã yirãji ñna. Jeyaro ñna moabojare ña godacoaro yiroja. Ito bajibojarocati jeame ñjurojũ cõabicũ yiguĩji Dios ñnare. Ñnare masogũ yiguĩji Dios Jesucristore ñna tuorũñja.

¹⁶ Espiritu Santo quedi sãja ecoana ñnari Dios ya wi robo bajirã ñna mani. ¿Iti gayere masibeati mña? ¹⁷ Dios ya wi robo bajirã ñnari ñ ñarã ñna mani ñja. Ito bajiri sīgũ manire ñ ñeñoja manire ñ ñeñore waja ñre waja senigũ yiguĩji Dios. Ito yicõri ñre ruyuriogũ yiguĩji Dios.

¹⁸ Mñamasiti mña rujurire ruobesa. “Adi sita gãna ñna masirise masi jeocõri buto masigũ ñna yũ”, yibitiruja mñare. Ado bajirojua mña yija quena. “Buto ñasagũ meje, buto masigũ meje ñna yũ”, yiruja mñare. Ito bajiro mña yija queno masirã ñarã yirãji mña. ¹⁹ “Queno masirã ñna gña”, adi sita gãna ñna yibojarocati ñe ma Dios ñ tija. Dios oca tuti iti gotija ado bajiro gotia: “Queno masirã ñna mani. Ado bajiro yirã yirãji mani”, ñna yi tuoñabojarocati ñnare camotagũ yiguĩji Dios, yi gotia Dios oca tuti. ²⁰ Gaje iti gotija ado bajiro gotia: Adi sita gãna queno masirã ñna masirisere masi jeocõami Dios. “Queno masibeamã ñna”, yami Dios, yi gotia ñ oca tuti. ²¹ Ito bajiri, “Yũ tuo sũyagujua ñnami buto masigũ”, yi tuoña wanũre ma mñare. Dios oca mñare riasorãre ñna oca mña tuo masitoni ñnare cũñi Dios. ²² Gña, yũ, Apolos, Pedrore cũni ñ oca mñare riasotoni gñare cũñi Dios. Adi sitajũ mani catiroti, mani godaroti cũni cũñi Dios. Jane gaye, ija rëtaroti gaye cũni manire cũ ñsiñi Dios manire ejabuaroti gaye. ²³ Cristo ñarã ñna mani. Ñ Cristo Dios yagũ ñnami. Ito bajiri mani cũni Dios

ñarã ña ïja.

4

Jesucristo oca goti ucuri masa ñna moare gaye

¹ Ado bajirojua guare mua tuoïaja quena: “Cristore moa ïsira ñama ñna”, guare mua yi tuoïaja quena. Guare cūñi Dios ï oca masa ñna masibitire gua riasotoni. ² Moare cū ecoana mani ñaja, queno mani moaja quena. Ito bajiro mani queno yija ticōri, manire tuorūnurã yirãji gãjerã. ³ “Cristore queno moa ïsigũ ñami Pablo”, mua yija, mua yibeja cūni, tuoïa usirio yibeja yu. “Cristore queno moa ïsigũ ñami Pablo”, masa ujarã ñna yija, ñna yibeja cūni, tuoïa usirio yibeja yu. “¿Cristore queno moa ïsicati yu? Queno moa ïsibitiruja gajea yu”, yi masibea yu. Cristo sīgũti “Ï ñami queno yure moa ïsigoru”, yi masiguïji. ⁴ Yu tuoïaja Cristore queno moa ïsicu yu. Ito bajibojarocati, “Seti macu ñami ï”, yireoni meje ña iti. Mani Uju Cristo riti ñaguïji, “Queno moa ïsiquï Pablo yure”, yigu. ⁵ Mani Uju ï ejaroto riojua, gãjerã ñna yirise ticōri, “Ñeñaro yirã ña mua”, yibitiruja manire. Mani Uju ï tudi ejari rumu, yeyorojua masa ñna yibojare gãjerã masa ñna tiro riojo itire gotigu yiguïji ï. “Ado bajiro yi ãmoa yu”, yi masa ñna tuoïa ñarise cūni recoti ïogũ yiguïji Dios. Ito bajiri ïre queno moa ïsigoana mani ñaja, “Queno yure yicu mua”, yi wanugũ yiguïji Dios manire.

⁶ Tuoya yu ñarã mua. Queno mua ñnatonu iti gaye muare busia yu. Yu gaye, Apolos gaye cūni muare gotia yu. “Ado bajiro yami Pablo, Apolos cūni”, mua yi masitoni iti gaye muare gotia yu. Itire masicōri adi tuti iti rotiro bajiro ricati yibitiruja muare. Ito yicōri, “Guajuare riasori masa, muare riasori masa rēto busaro masirã ñama ñna”, gãmeri yibitiruja muare. ⁷ “Gãjerã rētoro masirã ña gua”, yire ma muare. Jeyaro mua masirise Dios ï muare jidicãre ña. Mua

masirise mũamasiti mũa bujare meje ña. Dios ï jidicãre ña. “Dios oca riasoticõri, guamasiti queno tuo rõtobua gua”, yire ma mũare. “Dios ï ejabuarisena queno tuo rõtobua gua”, mũa yija quena.

⁸ “Dios oca queno masia gua. Dise ruyabeto jeyaro masi jeoa gua”, yi tuoïa mũa, yu tija. “Ujarã robo bajiro bajicã gua ïja”, yi tuoïabojacõri guare jidicã mũa ïja. Ito bajiro mũa yija, “Queno tuoïarã meje ñama ñna”, yi tuoïa yu mũare. Riti ujarã mũa ñaja, quena ñaboadoja. Ujarã mũa ñaja mũa rãcati rotiboana gua cuni. ⁹ Ado bajiro tuoïa yuama. Gua Jesucristo ocare riaso ucurã, “Bero gãna manire cũini Dios”, yiado bajiro tuoïa gua. “Inare siacõrã yirãji mani”, ñna yiana bajiro tuoïa gua. “No bajiro ñnare rõtaja tiana mani”, yi tiama masa guare. Adi sita gãna, ãmacũju ángel mesa cuni guare rõtaretire ti ñarãji ñna. ¹⁰ Jesucristo oca gua riasojare, “Mecuri masa ñama ñna”, yi tuoïama masa guare. Ito bajiro guare ñna yiroca, “Queno masirã ña guama”, yi tuoïa mũa. “Dios oca queno goti masirã meje ñama”, yi tuoïama masa guare. Ito bajiro guare ñna yiroca, “Dios ocare queno goti masia gua”, ya mũama. Guareama masa ti te ñama. “Masa ñna ti rucubuoana ña mani”, ya mũama. ¹¹ Iti mũmũju gua ñiocõcato bajiroti ñiocõa gua adocãta cuni. Ide ma guare. Yutabujuri cuni ma guare. Masa ñeñaro yama guare. Wi ma guare. ¹² Ruje moacõri boga gua. Masa ñna ñeñaro guare ñna busitubojarocati, “Dios queno yijaro mũare”, yire gaye rãca ñnare cudia gua. Guare ñna usirioro ñna yi codebojarocati ñnare gãmebea gua. ¹³ Guare ñeñaro ñna busitubojarocati, usiriomenati ñnajuare oca goti quenoa gua. Guare ti wanubeama ñna. Adi sita gãna ñna ãmobitire, ñna cõado robo bajiro guare tiama ñna. Iti mũmũju cuni, adocãta cuni ñaro bajiroti guare ti teama ñna.

¹⁴ Mũa bojo bujatoni meje ito bajiro mũare uca yu.

Yũ rĩa yũ mairã robo bajiro mũare tuoĩa yũ. Ito bajiri mũare goti riasogu adi mũare uca yũ. ¹⁵ Diez mil ñarã Jesús oca riasori masa ñabojarocati sīgũ ñami mũare Jesús oca riasosũocu. Yũ ña mũare cajero riasosũocacu. Ito bajiri mũa jacũ robo bajigu ña yũ. “Jesucristore mũa tuorũnũja, mũare masogũ yiguĩji Dios”, yũ yija tuocõri, ìre tuorũnũsũocu mũa. ¹⁶ Yũ yiado bajiroti mũa yitoni mũare josa yũ.

¹⁷ Ito bajiro mũa yire ãmoa yũ. Ito bajiri Timoteore mũa tu cõa yũ. Ì ñami mani Ëjũre queno tuorũnũgũ. Ito bajiri yũ macure bajiro ìre tuo maia yũ. “Cristore tuorũnũgũ ñari ado bajiro ñasotiami Pablo”, mũa yi masitoni mũare gotigu yiguĩji Timoteo. Jesucristore masirãre jeyaro yũ riaso ucure gaye mũare goti rõtobugũ yiguĩji ì. ¹⁸ “Mani tu ejabicũ yiguĩji Pablo. Ito bajiri mani ãmoro bajiroti yiana”, yi tuoĩa wanũboja mũa coriarã. ¹⁹ “Dios ì ãmoja, yoari mejeti mũare tigu wacu yiguja yũ”, yi tuoĩa yũ. Mũa tu yũ ejaja, ito bajiro tuoĩa wanũbojarãre tigu yiguja yũ. Mũa tu ejacõri, no bajiro ñna yija tigu yiguja yũ. Ito yicõri, riti Dios ì masirisena ñna moaja ti ejagu yiguja yũ. ²⁰ “Ìre tuorũnũrãre ì rotiroju miojugũ yiguĩji Dios”, mani yi masija, oca riti meje busirãji mani. Ì ejabuarisena queno ìre moa ìsirã yirãji mani. ²¹ ¿No bajiro ãmoati mũa? Ñeñaro mũa yisotire mũa jidicãbeja, “Quenabea mũa”, ¿yũ yi tudì ejare ãmoatite mũa? Ñeñaro mũa yirise mũa jidicãja, ¿mũa tu ejacõri yũ wanũrejuare ãmoatite mũa?

5

Rocati romiare ajere quenabea, yi Pablo ì gotire gaye

¹ Sīgũ mũa rãca gagũ ado bajiro oca ruyuami: “Ì jacũ manojo rãca quenabeto aje ñayiju”, yire oca ruyua. Iti ña bũto ñeñaro yire. Gãjerãma Diore masimena ñabojarãti itioniregorama yimenaji. ² Iti ñeñarise mũa wato ì yi

ñabojarocati, “Queno yirã ña gña”, ¿yi tuoña wanubojati mua? Masa ñna godaja bojori bujaro bajiro bojori buja ñaruja muare. Ñeñaro yigure ñre mua bucõaja quena. ³ Reco mua rãca ñabitibojaguti, yu tuoñarisena mua tujũ ña yu. Mua rãca ñabitibojaguti, “Ado bajiro yiroja ñ ñeñaro yirise waja”, yi masicã yu. ⁴ “Ado bajiro ãmoami mani Uju Cristo”, yirona mua minijuare ãmoa yu. Ito bajiro mua minijua ñaroca yu tuoñarisena mua rãca ñagũ yiguja yu. Mani Uju Jesucristo cuni ñ masirisena mua rãca ñagũ yiguñi ñ, “Ado bajiro gña yija quena”, mua yi tuoñatoni. ⁵ Minijuacõri ñeñaro yigure bucõaña mua, rũmúa uju Satanás ñ ãmoro bajiro ñre ñ yitoni. Ito bajiro mua yija, ñ ãmoro bajiroti ñ tõbujaroca yigu yiguñi Satanás ñre. Ito bajiro mua yija ñ ñeñaro yirisere jidicãgũ yiguñi gajea. Ito bajiro ñeñaro ñ yirise ñ jidicãja, mani Uju Jesucristo ñ tũdi ejari rumu ñre masogũ yiguñi.

⁶ Ito bajiro ñeñarise mua wato ñ yi ñaja, “Queno yirã ña gña”, yire ma muare. Wadarise uco jabeto mani wñoja, ñarocõti wusa jediroja. Ito bajiroti ñeñaro yigu mua wato ñ wusaja ñeñaro yirã riti ñarã yirãji mua. ¿Iti gayere masibeati mua? ⁷ Ito bajiri mua wato ñeñaro yigure bucõaña, gãjerã cuni ñeñaro ñna yibe yirona. ñre bajiro ñeñaro yibeama gãjerã maji. Ito bajiri ñeñaro yisugure bucõaja quena. Mani ñeñaro yirise waja, waja yirocu manire yiarì goda ñsiñi Cristo. Pascua basa menirã oveja macure siasotiana ñna. ñ robo bajiroti manire goda ñsirũ ñari, oveja macu robo bajiro bajigu ñami Cristo. Ito bajiri mani ñeñaro yirise Cristo ñ waja yicãre ñajare, mani wato ñeñaro yirãre bucõaja quena. ⁸ Ñeñarisere camotadig-oruja manire. Ito bajiro mani bajija naju wadarise uco wñoya mana robo bajirãji mani. Gãjerãre ti tudibitiruja manire. Ito yicõri jeyaro ñeñaro yirise jidicãcõri que-narise rioti yisotiruja manire.

⁹ Iti rumuju muare yu papera cõasucati ado bajiro muare goticu yu: “Rocati romia ajerã rãca baba cutibeja mua”, yi muare goti ñucacu yu iti rumuju. ¹⁰ Ito bajiro yu yicati, “Adi sita gãna Jesure masimenare camotadiya mua”, yirocu meje yicu yu. Ñna Jesure masimena rocati romiare ajerã ñama ñna. Jai busaro niyeru buja ãmorã ruorã ñama ñna. Riniri masa ñama ñna. Ito yicõri ñna meni rujeorure rucubuoama ñna. “Adi sita gãnare camotadiya”, yu yija, adi sitare wagoboana mua. “Ito bajiro yiba”, yirocu meje yicu yu. ¹¹ “Ado bajirojua yiba mua”, yirocu muare goticu yu. “Jesure tuorũnugũ ña yu”, yibojaguti, rocati romiare ajegu rãca baba cutibeja. Jai busaro bujarocu ruogure baba cutibeja. Ñna meni rujeorure rucubuoarãre baba cutibeja. Rocati ruocõri oca menigũ rãca baba cutibeja. Mecu jaigu rãca baba cutibeja. Ito yicõri, “Jesure tuorũnugũ ña yu”, yibojaguti rinire jaigure baba cutibeja, yirocu muare gotisucocu yu iti rumuju. Ito bajiro ñeñaro yirã rãca baba cutibeja. ¹²⁻¹³ Dios riti ñami Jesure tuorũnunenare ñna ñeñaro yirise waja, waja seni masigũ. Maniama ñna ñeñaro yirise waja, waja seniri masa meje ña mani. Ito bajibojarocati mani robo bajiro Jesucristore tuorũnurã ñabojarãti ñeñaro yirise ñna jidicã amobeja mani bucõaja quena. Dios oca tuti iti gotija ado bajiro gotia: “Mua rãca gagu ñeñaro yigure bucõaña”, yi gotia Dios oca tuti.

6

Gãji Jesure masigũ rãca mani oca cutire gaye

¹ Gãji Jesucristore masigũ rãca mua oca josaja, iti oca quenorona Jesure masimena oca quenori masa tu wabeja. Ado bajirojua mua yija quena. Jesure masirã oca quenori masa tujua mua waja quena. ² Mani Dios ñarã ñ rãcati adi sita gãnare beserã yirãji. ¿Itire masibeaati mua? Riti ñ rãca

beserã yirãji mani. Ito bajiri Dios rãca adi sita gãnare mani bese masija, oca jabeto iti ñaja queno masiruja manire. ³ “Ũmacũju ángel mesare Dios rãca beserã yirãji mani”, ¿yi masibeati mua? Ìnare mani bese masija, adocãta mani wato oca jabeto ñarisere queno masiruja manire. ⁴ Ito bajiri mua wato oca ñaja, Jesure masimena oca quenori masa tu wabeja. Ìnaõna tu mua waja quenabea. ⁵ Mua bojo bujatoni itire muare gotia yu. ¿Mua wato queno tuo masigũ Jesure tuorũnugũ oca quenori masu ñabiquĩjida? Ñaguĩji gajea. ⁶ Ito bajibojarocati gãji Jesure masigũ rãca mua oca josaja, Jesure masimena oca quenori masa tu warãji mua. Ito bajiro mua yija quenabea.

⁷ Jesure masirã ñabojarãti mua gãmeri tudija, “Jesure queno cudirã meje ñama ña maji”, yi tuoĩagũja yu muare. Gãjire mua seti yija quenabea. Sĩgũ muare ñeñaro ï yibojarocati, mua gãmebeja, itijua ña buto busa quenarise. Gãji muare ï rinija, riojoti tibojaja quena. Ìre gãmebeja. ⁸ Ito bajiro yibesa mua. Muamasiti ñeñaro yicõri mua ñarãre rinia mua.

⁹⁻¹⁰ “Dios ï rotiroju ejamena yirãji ñeñaro yiri masa”, yi masicãrã ñaboja mua. “Ñeñaro yirã ñabojarãti Dios tu ejarã yirãji mani”, yi tuoĩaboja mua. Ado bajiro ñeñaro yirã Dios tu wamenaji. Tuote mua. Rocati romiare ajerã Dios tu wamenaji. Ìna meni rujeorure rucuburã cuni wamena yirãji. Manojõ cutirã ñabojarãti gãjerã romiare ajerã, ña comasiti yirã cuni, riniri masa cuni, jai busaro bujarona ruorã cuni, mecũ jairã cuni, rocati socacõri ruo gotirã cuni, rini ucureã cuni Dios tu wamenaji. “Ìna robo bajiro ñeñaro mani yibojarocati Dios tu ejarã yirãji mani”, yi tuoĩabojabesa mua. ¹¹ Iti rumũju ña robo bajirã ñayija mua maji. Mua ñeñaro yirisere waja yi ecoana ña mua ïja. Ito bajiri Jesucristore tuorũnucõri Dios ñarã ña mua ïja. Espiritu Santona suoriti Dios ï boca ãmiana ña mani.

“Ĩna ñama quenarã. Yũre waja ruyuriobeama ĩna”, Dios ĩ yi tuoĩarã ña mani.

Mani ya ruju Dios yeti ña, yire gaye

¹² Ado bajiro yama coriarã: “Rẽore ma guare. Gua ãmoro bajiroti yi masia gua ĩja”, yama coriarã. Riti ña, ito bajibojarocati jeyaro mani yi ãmorise quenarise meje ña. Mani yi ãmorise gãjerãre iti ejabuabeja, yibitiruja manire. Mani ãmoro bajiro yi masirã ñabojarãti, ñẽñaro mani yi uyabojarisere yibe yirona, mani ya rujũre rẽoja quena. ¹³ Gãjerã ado bajiro yama: “Jeraga mani sãroti ña bare. Bare sãñariju ña jeraga. Ito bajiro manire meniñi Dios”, yama gãjerã. Ito bajibojarocati, mani ya jeraga, bare cuni ñatĩñaroti meje ña. Mani babojarise, mani ya jeraga cuni jediroca yigu yiguĩji Dios ũmacũju. Gãjerã ado bajiro yibojama ĩna: “Romia rãca mani ajetoni ruju manire ĩsiñi Dios”, yibojama ĩna. Ado robojuã bajaia: Mani Ujũre mani moa ĩsitoni ruju ña manire. ĩ ñami mani ya rujũre tirũnũgũ. ¹⁴ Mani Uju Jesucristore tudĩ catiroca Dios ĩ yiado bajiroti mani tudĩ catiroca yigu yiguĩji Dios. ĩ masirisena manire ãmi mũjagũ yiguĩji Dios.

¹⁵ Mani ya usiju quedi sãjacõri mani ya rujuju ñaguĩji Cristo. “Ito bajiro bajiguĩji”, ¿yi masibeati mua? ¿Mani ya usiju ĩ ñabojarocati wedi maso rãca mani waja quenati? Meje, quenabetoja. Ito bajiri itire yibitiruja manire.

¹⁶ Sĩgũ wedi maso rãca ĩ ajeja co ruju bajiroti ruju cutirã ñama ĩna. “Ito bajiro bajiroja”, ¿yi masibeati mua itire? Dios oca tuti ado bajiro gotia: “Manojo cutigu co ruju bajiroti ruju cutirã ñama ĩna”, yi gotia Dios oca tuti.

¹⁷ Sĩgũ Cristore boca ãmigũ ĩ ya usiju ĩ quedi sãjaroca sĩgũ robo bajiro bajiamã ĩna jũarã.

¹⁸ Ito bajiri mũamasiti mua ya ruju ñẽñaro iti tuoĩaro bajiroti ñẽñaro yibesa. Gaje ñẽñaro mani yirise mani ya

rujuna meje ya mani. No ĩmasiti ĩ ya rujũ ñeñaro iti tũoñaro bajiroti ñeñaro ĩ yija, ĩ ya rujũre ñeñoḡũ yami ĩ. ¹⁹ Manire Espiritu Santo queo sañi Dios. Ito bajiri Espiritu Santo mani rãca ñami ĩja. Manire ĩ quedi sãjaja bero mani ya rujuti ñaroja ĩ ya wi ĩja. Mani ya rujũ Dios yeti ña. ¿Itire masibeati mua? ĩ ñami mani Ɔjũ. ²⁰ Ito bajiroti baja. ĩ ñarã mani ñatoni waja rũcuro manire waja yi ãmiñi ĩ. Mani ya rujũ, mani tũoñarise cuni Dios yeti ña. Mani ya rujuna, mani ya usina cuni Dios ĩ ãmoro bajiro riti yirũja manire.

7

Manojo cutire gaye

¹ Paperana yũre mua seniã ñucare adocãta itire cudigu ya yũ. ¿Sĩḡũ manojo macũ ĩ ña ãmoja quena ñati? yũre mua yi seniã ñucare, “Quena ña”, ya yũ itire. ² Ito bajibojarocati, “Ĩna manojo cutibeja rocati ajerã yirãji gajea”, yi masicõri, “Ĩna manojo cutija quena”, ya yũ. Romia cuni ĩna manũju cutibeja rocati ajerã yirãji gajea. Ito bajiri ĩna manũju cutija quena. ³ Manojo cuticõri iso ãmoro bajiro cudija quena. Isojua cuni ito bajiroti manũju ĩ ãmoro bajiro cudija quena. ⁴ Manũju cuticõri, “Yũ ãmoro bajiro yicoja yũ”, yire ma romiore. Iso manũju yago ñamo iso ĩja. Manojo cuticõri, “Yũ ãmoro bajiro yicuja yũ”, yire ma ãmũḡũre cuni. ĩ manojo yagu ñami ĩ ĩja. ⁵ Ito bajiri manũju cutirã, manũju ĩ yi ãmoja, “Yibesã”, yire ma romiore. Ɔmũḡũre ito bajiroti, manojo iso yi ãmoja, “Yibesã”, yire ma ãmũḡũre. Diore rũcuburona, “Yibitirũja mani maji”, yi ĩna jũarãju ĩna tũoñaja, quena ña. Diore rũcubuo tĩorã ĩna yisotiado bajiroti ĩna yija quena ña mũcana. “Yoari ĩna yibeja ñemecuti masime-naji”, yi tũoñagũ ñami Satanás. Ito bajiri yoari ĩna yibeja, gãjerã rãca ĩna aje ãmoroca yi codeḡũ yiguĩji rũmũa Ɔjũ.

⁶ Itire mũare rotirocũ meje ya yũ. Yũ gotiro bajiroti mũa yija, “Quena ña”, yirocũ mũare ya yũ itire. ⁷ Yũmasiti yũ tũoĩaja, yũ bajiro riti mũa bajija quena. Manoyo macũ ña yũama. Ito bajibojarocati sīgũ robo bajirã meje ña mani. Gãjerãre ñna manoyo cõtiroca yami Dios. Gãjerãre manoyo mana ñabojarãti ñna wanũroca yami Dios.

⁸ Mũa manoyo manare, manoyo godagoanare cũni ado bajiro ya yũ mũare: Yũ robo bajiro manoyo mana mũa ñacõaja quena ña. ⁹ Ito bajibojarocati sīgũ ñ nemecuti masibeja, manoyo cõtija quena. Sīgũ romiare buto ñ tũoĩaja, ñ manoyo cõtija quena ñocãre. Romio cũni ãmũgũre buto iso tũoĩaja, iso manũju cõtija quena isore.

¹⁰ Ado bajiro rotia yũ mũare. Mũa manũju cõticanã gãmeri jidicãre ma. Iti ña mani Ʋju ñ rotire. Yũmasiti yũ tũoĩa rujeore meje ña iti. ¹¹ Sīgõ manũju jidicãro iso ñaja, gãji manũju cõtire ma isore. Iso manũju ñacãru rãca oca quenoja quena mũcana. Ito bajiroti ãmũgũ cũni ñ manoyo cõtija, jidicãre ma.

¹² Adocãta yũ tũoĩarisere mũare gotigu ya yũ. Mani Ʋju ñ gotigore meje ña iti. Ñ cũru ñari ado bajiro gotia yũ: Mũa coriarã Jesure masimena rãca manoyo cõtirã ñarãji mũa. Mũa manojosãromia mũa rãca ñna ña jidicã ãmobeja, jidicãre ma mũare. ¹³ Mũa coriarã Jesure masimena rãca manũju cõtirãji mũa. Mũa manũjusabatia mũa rãca ñna ña jidicã ãmobeja, jidicãre ma mũare. ¹⁴ Mũa manũjusabatia Jesure masimena ñabojarãti mũare ñna manoyo cõtija, ñnare cũni ti maigũ yiguĩji Dios. Dios mũare ñ queno yiado bajiroti mũa manũjusabatiare cũni queno yigu yiguĩji Dios. Ito bajiroti mũa manojosãromiare Jesucristore masimena ñabojarãti ñnare ti maigũ yiguĩji Dios. Mũa rĩare cũni ti maigũ yiguĩji Dios. Jesure tũorũnurã mũa ñajare, mũa rĩare cũni queno yigu yiguĩji Dios. “Yũre tũorũnũmena rĩa meje ñama”, yi tũoĩacõri mũa rĩare

cuni queno yigu yiguĩji Dios. ¹⁵ Sīgũ Jesure masigũ ĩ manojo Jesure tuorũnũbeco ñari iso jidicã ãmogõ iso josaja, jidicãja quena. Sīgũ mua manũju Jesure masibicu ñari ĩ jidicã ãmogũ ĩ josaja, jidicãja quena. Ñe oca manoti queno mani ñare ãmoguĩji Dios. Ito bajiri jidicã ãmorã ĩna josaja, ĩnare mai cũbeja quena. ¹⁶ “Jesure masigõ yũ ñajare yũ rãca ĩ ñaja, Jesure boca ãmigũ yiguĩji ĩ cuni”, yi tuoĩa masibea mua. “Jesure masigũ yũ ñajare yũ rãca iso ñaja, Jesure boca ãmigõ yigõji iso cuni”, yi tuoĩa masibea mua.

¹⁷ Mani ñaroto bajiroti manire cũni Dios. Jesure boca ãmicõri mani ñasuoado bajiroti mani ñaja quena. No Jesure tuorũnũrã ĩna minijuaja, ito bajiro gotisotia yũ ĩnare. ¹⁸ Sīgũ wiro tagoru Cristore ĩ boca ãmija, “Bujato baja wiro tagoru ña yũ”, yire ma. Sīgũ wiro taya macu Jesure ĩ boca ãmija, ĩ ñado bajiroti ĩ ñaja quena. ¹⁹ Wiro tana mani ñaja, taya mana mani ñaja cuni, no yibea. Ñasarise meje ña. Ado robojua baja ñasarise: Dios ĩ ãmoro bajiro mani yija, iti ña ñasarise. ²⁰ Cristore boca ãmicõri mani ñasuoado bajiroti mani ñaja quena. ²¹ Gãjerãre moa ĩsi ñarã Jesure mua boca ãmija, “Bujato baja ĩna josu ña yũ”, yire ma muare. Ito bajibojarocati muajuare ĩna bucõa ãmoja budija quena. ²² Gãjerãre moa ĩsi ñarã Jesure mua boca ãmija, mua uju josa meje ña mua adocãta. Cristo ñami mua uju adocãta, ito yicõri ĩre moa ĩsirã ña mua ĩja. Gãjerãre moa ĩsirã meje mua ñaja, Cristore boca ãmicõri, adocãta Cristore moa ĩsirã ña mua ĩja. ²³ ĩ ñarã mani ñatoni waja rucurisena manire waja yi ĩsiĩni Dios. ĩ sīgũti ñami mani Uju. Ito bajiri adocãta ĩre moa ĩsia mani. ĩ ãmoro bajiro riti yiruja manire. Adi macãrucũro ñeñaro yire mani yitoni gãjerã ĩna yi codebojaja ĩnare cudibitiruja manire. ²⁴ Tuoya yũ ñarã mua. Cristore boca ãmicõri, mani ñasuoado bajiroti mani ñaja quena. Ito yicõri Diore mani tuorũnũsotija quena.

²⁵ “Manujũ mana, manoyo manare cuni, ado bajiro rotiami mani Ʋjũ”, yire ma yũre. Ito bajibojarocati yũ tũoĩarise mũare gotigũ ya yũ. Yũre ti maicõri ĩ cũrũ ñari busia yũ. Ito bajiri yũre mũa tũorũnũja quena. ²⁶ Ado bajiro tũoĩa yũ: “Adi rũmũri ñare gaye josari ña. Ito bajiri mũa manoyo mana mũa ñado bajiroti ñaja quena”, yi tũoĩa yũ. ²⁷ “Mũa manoyo cuticãrã jidicãre ma ĩja. Mũa manoyo mana ñarã ãmabeja quena”, ya yũ mũare. ²⁸ Ito bajiro yũ yibojarocati, sīgũ ãmũgũ ĩ manoyo cuti ãmoja, ito yicõri romio cuni iso manujũ cuti ãmoja, ñna manujũ cutija ñeñaro yirã meje yama ñna. Manoyo cutirã buto oca ña codero bajiro usirioro bũjarã yirãji. Iti mũare bajibe yirocũ iti mũare goti camota yũ. Adi rũmũri josari ña manire. Ito bajiri manoyo cuticõri, manujũ cuticõri buto busa josari ñaro yiroja mũare.

²⁹ Tũoya yũ ñarã mũa. “Nocõ mejeti rũya manire”, yirocũ iti mũare gotia yũ. Mũa manoyo cutirã, manoyo mana bajiro Diore moa ĩsiña. ³⁰ Mũa godago ecoana, godago ecobitiana bajiro ĩre moa ĩsiña. Mũa basa ñarã, basamena bajiro Diore moa ĩsiña. Mũa gajeoni bũjarã, “Iti ña yũ ye”, yimenati Diore moa ĩsiña. ³¹ Mũa adi sitajũre queno bũjarã, queno bũjamena bajiro Diore moa ĩsiña. Adi sita gaye mani tirise jedi wajũ.

³² Tũoĩa usiriomenati mũa ñare ãmoa yũ. Sīgũ manoyo macũ mani Ʋjũ ye moarocũ, tũoĩagũ yiguĩji ĩ. Mani Ʋjũ ĩ wanũtoni tũoĩagũ yiguĩji ĩ. ³³ Manoyo cutigũ ĩ manoyo queno ñatoni adi sita gayere tũoĩagũ yiguĩji. Ito yicõri ĩ manoyo wanũtoni tũoĩa usiriogu yiguĩji. ³⁴ Diore moa ĩsire, manojore moa ĩsire jũaji tũoĩare gaye ñaroja ĩre. Manujũ cutigo, manujũ maco cuni ito bajiroti bajirãji ñna cuni. Manujũ maco ito bajiroti mani Ʋjũre moa ĩsiroco tũoĩa usiriogo yigõji. “Yũ ya rujũna, yũ ya usina cuni Diore moa ĩsigõ yigoja yũ”, yi tũoĩagõ yigõji iso. Manujũ

cutigoama iso manųju queno ñatoni adi ũmuari gayere tuoia usiriogo yigōji. Ito yicōri iso manųju wanutoni tuoia usiriogo yigōji.

³⁵ Mũare rēorocũ meje iti gotia yũ. Mũa queno ñatoni itire gotia yũ. Mũa queno yĩ ñare āmoa yũ. “Mani Uju Jesucristore riti moa ĩsigũ yigũja yũ”, yĩ mũa rũcũbũore āmoa yũ.

³⁶ “Yũ manojõ ñaroco bũcũacoamo ĩja. Butoguti isore āmocõa yũ. Ito bajiri ñemecũti masibea yũ”, yĩ tuoĩacõri sĭgũ ĩ manojõ cutija quena. Ito bajiro ĩ āmogõre ĩ manojõ cutija, ñeñaro yigũ meje yami ĩ. ³⁷ Gãjiama, “Manojõ macũ ñagũ yigũja yũ”, yĩ tuoĩacõri ĩ tuoĩaro bajiro ĩ manojõ cutibeja quena. “Manojõ macũ ñabojaguti ñemecũti masia yũ”, ĩ ya usiju ĩ yĩ tuoia masija, manojõ macũ ĩ ñaja quenaña ĩocũre. ³⁸ Sĭgũ ito bajiro buto ĩ āmogõre ĩ manojõ cutija queno yami. Ito bajibojarocati gãjiama ĩ manojõ cutibeja queno bũsa yami ĩ.

³⁹ Sĭgõ manųju cuticãro, manųju ĩ catiroca riti gãji rãca manųju cutire ma isore. Iso manųju godagoja, gãji iso āmogũ rãca iso manųju cutija quena ña. Gãji Jesure masigũ rãca iso manųju cutija quena. ⁴⁰ Ito bajibojarocati mũcana tũdi iso manųju cuti āmobeja, “Buto bũsa wanũgõ yigõji iso”, yĩ tuoia yũ. “Espĩritu Santo yũre ĩ ejabũajare, ito bajiro bũsia yũ”, yĩ tuoia yũ.

8

Ĩna meni rujeoanare ecare gaye

¹ ĩna meni rujeoanare rũcũbũorã waibũcũrã sĭacõri ecare gaye mũare busigu ya yũ adocãta. “Itire mani baja, quena ña. Ñeñaro yibea mani”, yĩ masi jedirãji mũa. Ito bajibojarocati, “Gãjerã rētoro masirã ña gua”, mũa yibojaja, masirã meje ña mũa. Gãmeri mani ti maija itijua ña ñasarise. Gãmeri mani ti maija, gãmeri tuoia oca sēoroca

yirãji mani. ²“Queno masigũ ña yu”, sigũ i yibojaja, queno masigũ meje ñami ïocũ. Ì masiriseonijũare masibeami Ì. ³No Diore ti maigũre, Ìre ti masicõri Ìre maigũ yiguĩji Dios.

⁴ Ìna meni rujeoanare waibucu sãacõri Ìna ecare gaye mũare busigu ya yu. “Masa Ìna meni rujeoana ñasarã meje ñama”, yi tuoĩa mani. “Dios sigũti ñami ñasagu”, yi tuoĩa mani. ⁵ Adi sita gãna Diore masimena Ìna gotija, “Ûmacũju, jacaju cuni mani rucubũorona ñama Ìna. Jãjarã ñarãji mani rucubũorona, mani çjarã”, yi tuoĩabojama Diore masimena. ⁶ Ito bajiro Ìna yi tuoĩabojarocati, jãjarã meje ñama mani rucubũorona. Dios mani Jacu sigũti ñami mani rucubũosarocu. Ìti ñami jeyarore rujeoru. Ìre moa Ìsirona ña mani. Sigũ ñami mani Hju. Ì ñami Jesucristo. Ìna suoriti jeyaro ña. “Mani cuni Ìna suoriti ña”, yi tuoĩa mani.

⁷ Ito bajiro mani yi tuoĩabojarocati gãjerã Jesure masirã ñabojarãti masimenaji iti gayere. Jesure Ìna masiroto riojua Ìna meni rujeoanare rucubũorã ñayijarã Ìna maji. Ito bajiri, “Masa Ìna meni rujeorure bare Ìna ecare mani baja, quenabetoja manire, ñeñaro ya mani”, yi tuoĩarãji Ìna. Ito bajiro tuoĩabojarãti Ìna baja, tuoĩa oca sèomena yirãji Ìna. Ito yicõri queno Diore cudimenaji Ìna. ⁸ Mani baja, mani babeja cuni ñasarise meje ña iti Dios i tija. “Itire mani babeja, manire ti wanugũ yiguĩji Dios”, yire ma. Ito yicõri, “Itire mani baja, manire ti wanubicu yiguĩji Dios”, yire cuni ma. ⁹ “Mani baja, mani babeja cuni no yibea”, yi masibojarãti mani baroto riojua queno tuoĩaja quena. Itire mani baja ticõri, “Diore masibojarãti queno cudibeamã Ìna”, yi tuoĩagũ yiguĩji Jesure tuorũnũuogũ gajea. Ito bajiro tuoĩa wisacõri Jesure tuoĩa jidicãgũ yiguĩji. ¹⁰ Ado bajiro rëtaraja gajea. Sigũ Jesure tuorũnũuogũ Ìna meni rujeorure Ìna ecare mani baja tigu yiguĩji gajea. Itire mani baja, “Quena ña. No yibea”, yi

tuoïa mani. Ito bajibojarocati ijũama masibiquĩji itire. Mani baja ticõri, “Yũ baja quenabetoja”, yi tuoïabojaguti bagũ yiguĩji ĩ cuni. ¹¹ “Rẽore ma”, yi masibojarãti mani baja, Jesure tuorũnusugũ ĩ tuoïa jidicãroca yirã yirãji gajea mani. ĩre yiarĩ cuni goda ĩsiĩni Cristo. Mani baja ticõri, Jesucristore jidicãgũ yiguĩji. Ito bajiri, “Rẽore ma”, yi masibojarãti babitirũja manire. ¹² Itire mani baja ticõri, sĩgũ Jesure tuorũnusugũre ĩ tuoïa wisaroca yirãji mani. Ito bajiro mani yija ĩre riti meje ñeñaro ya mani. Cristore cuni ñeñaro yirã ya mani. ¹³ Ito bajiri waibũcũ yũ baja ticõri sĩgũ Jesure tuorũnusugũ ĩ tuoïa wisaroca yũ yija, waibũcũ ri babitirũja yũre. Jesure ĩ tuoïa jidicãroca yibe yirocũ itire babitirũja yũre.

9

Jesucristo ĩ cũana ñari, “Ado bajiro yiana mani”, ĩna yire gaye

¹ Yũ ãmoro bajiro yi masibojaguti Jesucristo ãmoro bajiro cũdirocũ ña yũ. ĩ oca yũ goti ucutoni yũre cũĩni Dios. ĩre moa ĩsigũ mũare riasocũ yũ. “Pablo ĩ riasorisere tuocõri, Jesure tuorũnusucũ mani”, yi tuoĩarãji mũa.

² “Jesús ĩ cũrũ meje ñami Pablo”, yirã yirãji gajea gãjerã. Yũ riasorisere tuocõri Jesure tuorũnucũ mũa. Ito bajiri itina, “Jesús ĩ cũrũ ñami Pablo”, yi tuoĩarã yirãji mũa.

³ “Jesús ĩ cũrũ meje ñami Pablo”, ĩna yija, ado bajiro cũdia yũ: ⁴ Jesús ĩ cũrũ ña yũ. Ito bajiri yũ riasore waja yũre ĩna ecaja, yũre ĩna ioja cuni boca ãmire ña yũre. ⁵ Gãjerã Jesús ĩ cũana masare riaso ucurã ĩna waja, ĩna manojosãromia rãca wa ucuama. Ito bajiroti ĩna manojosãromia rãca riaso ucurã wama Jesús ocabaji mesa, ito yicõri Pedro cuni. ĩna manoyo cutiado bajiroti sĩgõ Jesure tuorũnugõ rãca yũ manoyo cuti ãmoja, manoyo cuti masia yũ cuni. ⁶ Jesucristo oca goti ucuri masa ĩna ña

masitoni jeyaro ejabua mua ñnareama. “Bernabé, Pablo rãca Jesucristo oca goti ucurã ñna ñna masitoni ñna moaja quena”, ¿yi tuoĩati mua guareama? ⁷ Gãjerãre moa ñsirã ñnari waja bujarã yirãji surara. Rocati ñnarena yirãji. Uyé otegu iti ricare bagu yiguĩji. Oveja coderi masu cuni ñna ya õjegõa bijecõri idigu yiguĩji ñ. ⁸ Iti yu gotirise, “Í tuoĩarise busiami Pablo”, ¿yi tuoĩati mua yure? Bajibea. Ito bajiroti gotia Moisés ñayoru ñ rotire cuni. ⁹ Dios rotirise ucagu ado bajiro ucañi Moisés ñayoru: “Ta wecu trigo ajere ñ wi cuda codaja, ‘Bajaro ñ cuni jabeto’, yirona ñ ya rise sia biabesa”, yi gotia Dios oca tuti. Ta wecu ñ batoni tuoĩa usiriogu meje itire yini Dios. ¹⁰ Gua ñ oca riaso ucurãre tuoĩacõri ito bajiro gotiñi Dios. Guare masa ejabuatoni itire gotiñi ñ. Weseca moagũ, trigo ajeri codagu cuni, “Ito bajiro bujagu yiguja yu”, yi tuoĩa wanucõri moama ñna. ¹¹ Dios oca muare riasosuorã, wesecaju oterã bajiro moacu gua. ¿Weseca oteri masa ñna bujado bajiro muare gua bujaja, no bajirojada? ¿Gua riasore waja guare mua ejabuaja, no bajirojada? ¹² Gãjerã Dios oca muare riasoanare ñna ñnaton ñna ñmorise ñsiyija mua. ñnare mua ñsija, gua muare riasosuonanajuare queno busa mua ñsija quena. “Muare riasocu gua. Ito bajiri gua ñnaton gua bojoro bujarise ñsiña”, yi tuoĩabobarãti muare senibiticu gua.

Ado robojua bajicu gua. Guare bare manija, yutabujuri manija, riojoti ñnemecuticu gua. “Cristo oca mani riasoroca ñnare mani senija, ñ ocare boca ñmimenaji ñna”, yi tuoĩacõri muare senibiticu gua. Riojoti ñnemecuticu gua. ¹³ Judio masa ñna minijuara wi ñna moaja iti wi gayeti bocatirãji. Ado bajiro bajia iti. Diore rucuburona ñna menira casabo waibucurã siacõri ñna soeriseti bama itiju moari masa. Itire masia mua. ¹⁴ Ito bajiroti bajia Cristo oca riasorãre cuni. ñna riasore waja ñna riasoana ñnare ejabuaja quena. Ito bajiro rotiñi mani Uju Cristo. ¹⁵ Muare

seni masibojaguti coji mũare senibiticu yu. Adi yu mũare ucarise cuni yure mua ĩsitioni meje uca yu. Nĩocõ goda wabojaguti mũare senibicu yigũja yu. “Senibicuti masare riasocu yu”, yi tuoĩacõri wanua yu.

¹⁶ “Īre tuorũnurãre masogũ yiguĩji Cristo”, yu yi masare riasoja, “Queno yigu ña yu”, yi tuoĩabea yu. Ito bajiro yu goti ucutioni yure cũni Jesucristo. Masare ĩ oca yu riasobeja, quenabeto rẽtaroja yure. Iti yu riasobeja, wanubicu yigũja yu. ¹⁷ Waja bũjarocu yu riasoja, “Waja bũjagu yigũja yu”, yibogũja yu. Ito bajiro meje baja. Yu tuoĩarise meje riasoa yu. Dios ĩ yure cũado bajiroti riasoa yu. ¹⁸ Ado robojua baja yu waja bũjarise. Masare waja senibicuti, “Īre tuorũnurãre masogũ yiguĩji Dios”, yi riasoa yu. Waja bũjarocu meje ĩ ocare riasoa yu. Itire masicõri wanua yu. Iti ña yu bũjarise. “Mũare yu riasore waja yure mua ĩsija quena”, yi masibojaguti mũare senibiticu yu.

¹⁹ Gãjire moa ĩsiri masu meje ña yu. Ito bajibojarocati mua jeyarore moa ĩsigũ bajiro ña yu. Jãjarã busa Jesucristore tuorũnũjaro, yirocu ito bajiro moa yu. ²⁰ Judio masa rãca yu ñaja, ĩnare bajiroti ña yu cuni. Jesure ĩna tuorũnũre ãmogũ ito bajiro ya yu. Moisés ñayoru rotire cudirã rãca yu ñaja, ĩna robo bajiroti ña yu. Itire cudibitirocu ñabojaguti Jesure ĩna tuorũnũre ãmogũ ĩna bajiroti ña yu. ²¹ Gãjerã Moisés ñayoru rotire cudimena rãca yu ñaja, ĩna bajiroti ña yu. Ito bajibojarocati, “Dios ĩ rotire cudigu meje ña yu”, yibea yu ĩnare. Jesure ĩna tuorũnũre ãmogũ ito bajiroti ya yu. Cristore cudigu ñari Dios ĩ rotire ña yu cudiroti. ²² Jesucristore tuorũnũsuorã rãca yu ñaja, ĩna bajiroti ña yu. Ito bajiro ya yu bũto busa Jesucristore ĩna tuorũnũtoni. No masa rãca yu ñaja, ĩna rãca gagu bajiro ya yu. Ito bajiro ya yu, “Īre tuorũnurãre masogũ yiguĩji Cristo”, yi yu riasore tuocõri

Cristore ñna boca ãmitoni. ²³ “Ïre tuorũnurãre masogũ yiguĩji Cristo”, yire gaye masa ñna tuo jeditoni iti gayere moa yũ. Jesucristore boca ãmicõri masa ñna wanũre ti ãmogũ itire moa yũ.

²⁴ Masa ñna ũmaquedija, sīgũ ruyabeto ũmaquedicã. Ito bajibojarocati sīgũti ñnaquĩ ejasũogu. Ï ñnaquĩ ejasũore waja, waja bũjagu. Itire masia mũa. Cajero ejasũorocu ï ũmaquedisũoado bajiro Diore queno moa ïsiña mũa. Dios tũ bũjarona ïre queno moa ïsiña mũa. ²⁵ No cajero ũmaquedi rētocũ ãmorã dise ñna ya rujũri ñeñorise gayere rēoama ñna. Ito bajiro josari moama ñna jũ suara bedo nocõ mejeti jogari bedore bũjarona. Maniama jogabiti gayere bũjarona bũto Diore moa ïsia. ²⁶ “Ado bajiro yũ yire ãmoguĩji Dios”, yi tuoĩa masicõri, Diore moa ïsia yũ. Sīgũ rocati ï roca wuebojaro bajiro meje ya yũ. “Ado bajiro ãmoguĩji Dios”, yi masibiticõri meje ïre moa ïsia yũ. ²⁷ Ado robojũa bajia. Diore moa ïsi ãmogũ ñari, yũ ãmorise meje ya yũ. Yũ ya rujũ ñeñaro iti tuoĩabojarocati ito bajiro yibea yũ. Yũ ya rujũre rēocõri Diore riti moa ïsia yũ. Ito bajiro yũ ya rujũre yũ rēobeja, masare Dios oca riasoru yũ ñabojarocati, “Queno yicũ mũ”, yi boca ãmibiquĩji Dios yũre.

10

Masa ñna meni rujeorũre rũcũbũobesa, yire gaye

¹ Tũoya yũ ñarã mũa. Mani ñicũsabatiare ñna wa masi jeditoni ide buerina ñnare ïoyijũ Dios. Riaca jajosa Ide Sũarise wame cõtirisa ñna jẽa masi jediroca yiyijũ Dios. Itire tuoĩa ãcabojabesa mũa. ² Moisés ñayorũre tuorũnũcõri ide buerire sũya wayijarã ñna. Ito yicõri riaca jajosa jẽayijarã ñna. Moisés ñayorũre tuorũnũcõri ïre sũya jediyijarã ñna. ³ Ũmacũju gaye manã wame cõtirise Dios ï queore ba jediyijarã ñna. ⁴ Ñna idi catitoni gũtagã ide

budiroca yiyijũ Dios. Iti gũtana suoriti meje catiyijarã ãna. Cristo ãnare tirũnũjare catiyijarã ãna. No ãna waroti ãnare tirũnũsotiyijũ Cristo. ⁵ Ito bajibojarocati ãna jãjarã Diore cudibisijarã. ãna cudibeja ticõri, ãnare wanũbisijũ Dios. Ito bajiri Diore ãna cudibitire waja yucũ manojũ goda jediyijarã ãna.

⁶ “ ‘Ito bajiro rẽtayijũ ãnare’, yi masibojarãti mani ñeñaro yi ãmoja, ito bajiroti rẽtaroja manire cuni”, mani yi tũo gũija quena. ⁷ Ito bajiri ãna meni rujeoana ãna rũcũbuoado bajiro rũcũbuobesa mũa. Jeyaro ãnare bajigore gaye Dios oca tuti iti gotija, ado bajiro gotia: “Ba rujijijarã. Ito yicõri jiarise idiyijarã ãna. Ito yicõri ãna meni rujeorũre rũcũbuorona basayijarã ãna”, yi gotia Dios oca tuti. ⁸ Rocati romiare ãna ajeado bajiro yibitirũja manire. Ito bajiro ñeñaro yicõri veintitrẽs mil ñarã corumũti goda jediyijarã ãna. ⁹ “Mani ñeñaro yibojarocati manire waja senibiquĩji Dios”, yi mani ñicũsabatia ãna yibojado bajiro yibitirũja manire. Ito bajiro ñeñaro yicõri ãña ocana jãjarã godayijarã ãna. ¹⁰ Diore ãna bũsitu ñado bajiro yibitirũja manire. Ito bajiro ãna yijare, sigũ ángel jãjarãre ã sã batetoni cõayijũ Dios.

¹¹ Jeyaro mani ñicũsabatia retagore oca ña jedia Dios oca tutijũ. Mani Jesús ã ejarotire tũoã yurã, mani tiroti ña iti oca. ãnare bajiro ñeñaro mani yibititoni, Dios oca tutijũ ña iti oca. ãnare bajiro mani yija, tõbũjarã yirãji mani cuni. ¹² No “Ñeñaro yibicũja yũ”, yi tũoãbojaguti, ñeñaro yigũ yiguĩji gajea. Ito bajiri ñeñaro yibe yirocũ queno ã tũoãja quena. ¹³ Manire riti mani ñeñaro yitoni meje usirioro yi codeami rũmũa mũjũ. Mani riojũa gãnare cuni, masa jeyarore cuni usirioro yi codeami ã. Manire ã usirioro yi codebojarocati, mani ñeñaro yibititoni Diore mani tũorũnũja, manire ejabũagũ yiguĩji ã. “Mũa ñeñaro yibititoni mũare ejabũagũ yigũja yũ”, Dios ã yiado ba-

jiroti manire ejabuagu yiguĩji ĩ. Rũmúa ɥju Satanás bato ɥsirioro manire ñeñaro ĩ yi rotibojarocati, Diore mani tuorũnɥja, itire mani ñemecutiroca yigu yiguĩji Dios manire. Mani ñeñaro yi ãmorise mani yibititoni manire ejabuagu yiguĩji Dios.

¹⁴ Ito bajiri yu ñarã mua, ĩna meni rujeorure rũcubuo besa mua. ¹⁵ Yu busirisere tuo masirã ña mua. “Riti gotiami Pablo”, yi tuoĩarã ña mua. ¹⁶ “Queno ya Dios mu. Gua ñeñaro yirise waja, waja yi ĩsirocure mu Macu Cristore cõayija mu”, yicõri ɥyé ide bato idia mani. Itire tuoĩarã, “Yucutẽojũ manire yiari goda ĩsiñi Cristo”, yi tuoĩa jedia mani. Cristo ya rujure tuoĩarã, najure bato ba mani. “Yucutẽojũ manire yiari goda ĩsiñi Cristo”, yi tuoĩa jedicõri bato ba mani. ¹⁷ Jãjarã ñabojarãti sīgũre bajiro riti tuoĩarã ña mani. Jesure tuoĩarã najuro corona bato ba mani. Ito bajiro yicõri Cristore riti tuorũnɥja mani. Sīgũre bajiro riti tuoĩarã ña mani. Ito bajiri jãjarã ñabojarãti co rujũ robo bajiro bajirã ña mani.

¹⁸ Israel sita gãnare tuoĩate mua. ĩna ñeñaro yirise waja, waja yirona waibucu ri soerãji ĩna Diore rũcubuo rã. Sīgũre bajiro riti tuoĩacõri ĩna soe ĩsirere barãji ĩna. ¹⁹ “Masa ĩna meni rujeorure rũcubuoja quena ña”, yirocu meje ya yu itire. Ito yicõri, “ĩna meni rujeorure waibucu ri ĩsire gaje waibucu ri rẽtoro ñasarise ña”, yirocu meje ya yu itire. ²⁰ Ado bajirojũa mũare yirocu ya yu: Diore masimena ĩna meni rujeorure ĩna ecaja, Diore ecarã meje yama ĩna. Rũmũare ecarã yama ĩna. Ito bajiri ĩna rãca baba cuticõri mua baja rũmũare rũcubuo rã bajiro yirãji mua. Ito bajiro mua yire ãmobe a yu. ²¹ Rũmũare mani cudija, Jesús mani ɥjure cudirã meje ña mani. Ito bajiro mani yija, Jesure tuoĩarã idisusare gaye ɥyé ide idibitirũja manire. Ito yicõri Jesure tuoĩarã basusare gaye babitirũja manire.

²² “Yu ñarã ñabojarãti rûmûre cûdiama ñna”, Jesús ï yi junisiniroca yibitirûja manire. Ï rêtoro masirã meje ña mani.

Mani gãmeri ti maija quena, yire gaye

²³ “Dios ï rêobeja mani âmoro bajiro mani yija quena”, yi tuoïama gãjerã. Ito bajiro ñna yi tuoïabojarocati ado bajirojua ya yuama. Jeyaro mani yi âmoro bajiro mani yibojarocati queno ejabuabetoja manire. Mani âmoro bajiro mani yija, Jesure tuorûnusuoгу ï tuorûnu jidicãroca yirã yirãji gajea mani. ²⁴ Mani queno ñaroti gaye riti tuoïabitirûja manire. Gãjerã ñna queno ñatoni, ñnare ejabuarona tuoïarûja manire. Jesure tuorûnu jidicãbitiraro ñna, yirona tuoïarûja manire.

²⁵ Waibucu ri ñna ïsirijû waja yicõri mua baja quena. “¿Ïna meni rujeorure ecagore meje ñati adi?” yi seniãabesa. Riojoti waja yicõri mua baja quena. ²⁶ Adi sita gaye jeyaro Dios ï rujeore ña. Ito bajiri disejua ruyabeto ï ye riti ña. Ï rujeore iti ñajare, mani baja quena.

²⁷ Sîgû Jesure tuorûnugû meje ñagû, “Yu tu barã waya”, ï yija, ï ecaro bajiroti baja quena. “¿Ïna meni rujeorure ñna ecagore meje ñati?” yi seniãamenati baja quena. ²⁸ Gãji itire ba güigû, “Ïna meni rujeorure ñna ecagore ña adi”, ï yi goti masioja, babeja itire. Itire mua baja ticõri, ï tuoïarisejû tuoïa bûjatobicu yiguïji ï. “Ñeñaro yama ñna”, yi tuoïacõri bûjatobicu yuguïji. Ito bajiri Jesure ï jidicãme yirona, babeja itire. ²⁹ “Jeyaro waibucu ri mani baja quena ña”, yi tuoïabojarãti, “Iti gaye mani baja quenabea”, gãjerã ñna yi tuoïarisere babitirûja manire.

Mua coriarã ado bajiro yirã yirãji gajea: “Itire baja quenabea”, gãjerã ñna yi tuoïabojarocati, ¿itire ba jidicãgû yigûjada yu? yi tuoïarãji mua coriarã. ³⁰ Gaje ado bajiro

yirãji mũa: Yũ baroto riojũa, “Queno ya Dios mũ”, yũ yibojarocati gãjerã, “Babitorũa mũare”, yi codebitirũa ñnare, yirãji mũa. ³¹ Ado robojũa baja: No mani bariseti, mani idirise, mani moarise cũi Diore masa ñna rũcũbũoroca yirũa manire. ³² Gãjerã ñna ñeñaro yi ãmoroca yibe yirona, quenarise riti yirũa manire. Judio masa, judio masa meje cũi Jesure tũorũnrãre cũi ñna ñeñaro yi ãmoroca yibitorũa manire. ³³ Yũama ado bajiro tũoĩa yũ: Jeyaro yũ yirise masa ñna ti wanũ jedire ãmoa yũ. Sĩgũti queno yũ ñaroti gayere tũoĩabea yũ. Jesure ñna tũorũnrẽre ãmogũ ñna queno ñaroti gayejũare tũoĩa yũ. Jeame ãjũroju ñna wabore ñaroca ñnare Dios masore ãmoa yũ.

11

¹ Cristo ñ yiado bajiroti ya yũ cũi. Ito bajiri yũ yiro bajiroti yiya mũa cũi.

Mani minijuaja romia ado bajiro ñna yija quena, yire gaye

² Tũoya yũ ñarã mũa. Mũare yũ riasocatire yiro robo yirã ñna mũa. Ito bajiri yũre mũa ãcabojabẽjare mũare queno wanũa yũ. ³ Gaje mũa tũo masire ãmoa yũ. Ado bajiro baja iti. Manajo cũtigũ ñ manajo rijoga ñami ãmũgũ. Mani ãmũa rijoga ñami Cristo. Ito bajiroti Cristo rijoga ñami Dios. ⁴ Sĩgũ minijuara wiju ñ ya rijoga bũagu Diore ñ senija, Dios oca ñ busija cũi, Diore rũcũbũobicũ bajiro yami ñocũ. ⁵ Minijuara wiju sĩgõ rijoga bũabeco Diore iso senija, Dios oca iso riasoja cũi, iso manũjũre rũcũbũobeco bajiro yamo iso. Rijoga iso bũabeja, joa suagoro bajiro bajigõji iso. ⁶ Sĩgõ iso rijoga bũa ãmobeja, cojisiti joa sua jeocõja quena isoõcõreama. “Rijoga joa suagoja bojo ñna yũ”, yi iso tũoĩaja, rijoga iso bũaja quena. ⁷ Mani ãmũare minijuara wiju rijoga bũare ma manire. Ñ robo bajigu manire rujeoñi Dios. Manimasi gãmeri

ticōri, “Queno masigũ ñami Dios”, yi tuoña mani. Ito bajiri ñre wanucōri ñre rucubuoá mani. Romiama mani ãmuare rucubuoá ñama. Ito bajiri, “Ûmuare rucubuoá gũ”, yirona rijoga ñna buaja quena. ⁸ Ado robojua bajaia: Ûmugũre rujeogu romio ya gōana meje rujeoyijũ Dios. Romiare rujeogu ãmugũ ya gōana rujeoyijũ. ⁹ Romiore ejabuarocare meje ãmugũre rujeoñi Dios. Ûmugũjuare ejabuarocore romiore rujeoñi Dios. ¹⁰ Ito bajiri, “Yũre ãmatã ñagũ ñari yũ ya rijoga bajiro bajigũ ñami yũ manũju”, yiroco iso ya rijoga buaja quena romiore. Ito bajiro ñna yija ticōri, ñnare ti wanurã yirãji ángel mesa. ¹¹ Ûmua cuni, romia cuni ñna ñare ãmoñi Dios. Romia ñna manija, queno ña masimenaji ãmua. Romia ito bajiroti ãmua ñna manija, queno ña masimenaji romia. Ito bajiri mani Jesús ñarã, “Ñe waja mama ãmua, ñe waja mama romia”, yire ma manire. ¹² Ado robojua bajaia: Ûmugũ ya gōana romiore rujeoñi Dios. Ito bajibojarocati romiana rujeana ñama ãmua. Mani ãmua, romia cuni Dios ñ rujeoana riti ña mani.

¹³ Adi muare yũ gotirise queno tuoñaña mua. Minijuara wijũ rijoga buabecoti, ¿Diore iso senija quenati? Quenabea. ¹⁴ “Ûmua joa yoarise ñna ãmaja, bojorise ña”, yi tuoña jedia mani. ¹⁵ Romiareama joa yoarise ñna ãmaja, queno ti wanua mani. Joa yoarise iso ãmaja, iso ya rijoga buago bajiro yamo iso. ¹⁶ Sīgũ adi yũ gotirisere ñ tuoña busi ãmoja, ado bajiro ñre gotija quena: “Gua, gãjerã Jesure tuorũnurã cuni, ito bajiro riti yisotia gũ”, yi gotija quena ñre.

Jesús ñ basusare gaye barã queno ñna yibitire gaye

¹⁷ Adocãta muare yũ ucarise, muare wanugũ meje uca yũ. Jesús basusare gaye minijua barona queno yibea mua. Mani ãju ñ basusare gayere ñeñoa mua. ¹⁸ “Ñna minijuaja,

ricati riti tuoĩama”, yire gaye tuoa yu muare. “Riti bajiroja”, yi tuoĩa yu itire. ¹⁹ “Mani tuoĩa busija, ‘Inati ñama Jesure tuorũnũsarã’, yi tuoĩarã yirãji gãjerã manire”, yi tuoĩa busiboja mua. ²⁰ Ricati riti tuoĩa basicõri, Jesús basusare gaye mua minijua baja, mani Ujũre rũcũbuorã meje yirãji mua. ²¹ Barajũ iti ejaroca mua ãmoro bajiroti ba ãmorãji mua yajirona. Cocati bare bato bamenaji mua. Ito bajiro mua yija, gãjerã ñiocõrãji. Gãjerãma idi mecurãji ñna. ²² Wiri cutirã ña mua. Mua ya wirijũ mua ba, idi, yija quena. Ito bajiro queno mua yibeja, Jesús basusare gaye barã gãjerã queno ba bujamena, bujato ñna bujaroca ya mua. Ito bajiro mua yija gãjerã Jesure tuorũnũrãre ti tudirã bajiro ya mua. “Queno ya mua”, ¿yiguti yu muare? Meje yi ãmobe a yu. Muare wanũbea yu.

Mani Ujũ ñ basusare gaye

(Mt 26.26-29; Mr 14.22-25; Lc 22.14-20)

²³ Adi muare yu riasorise mani Ujũ ñ basusare gaye muare yu riaso masitoni yu masiroca yiñi ñ. Ado bajiro baja: Mani Ujũre ñ wajana ñiatoni Judas ñ gotira ñami, ñ ya ãmona naju ãmi rũcoyijũ Jesús. ²⁴ ãmi rũcocõri, “Queno ya Dios mu”, yiyijũ ñ. Igata batocõri ado bajiro yiyijũ ñ, ñ rãca riasotirãre: “Ñmo baya. Adi ña yu ya rujũ robo bajiro bajirise. Muare yiari goda ñsigũ yigũja yu. Yu godaja bero yu muare ñogore tuoĩacõri yure rũcũbuorã ado bajiroti minijua basotiba”, yiyijũ Jesús ñ rãca riasotirãre. ²⁵ ñna baja bero uyé ide tẽro ãmi rũcoyijũ Jesús. Ito yicõri ado bajiro ñnare gotiyijũ ñ: “Ñmo idiya. Muare yiari yu ya rí budiri yiroja yure. Yu ya rina suoriti, ‘Ado bajiro masare queno yigũ yigũja yu’, Dios ñ yiado bajiroti ñnasoro yiroja ñja. Yu godaja bero yu muare ñogore tuoĩacõri, yure rũcũbuorã ado bajiroti minijua idisotiba”, yiyijũ Jesús ñ rãca riasotirãre. ²⁶ Mani Ujũ ñ rotiado bajiroti mani baja,

mani idija cuni, “Manire yiari goda ĩsiĥi Cristo”, yirona ito bajiro basotia mani. Mani Ɖju ĩ ejarocaju ito bajiro yisusarã yirãji mani.

Mani Ɖju ĩ basusare gaye mani baja, ado bajiro mani baja quena, yire gaye

²⁷ Ado robojuã baja: No Diore rŭcubuo bicuti rocati mani Ɖju ĩ basusare gaye ĩ baja, ĩ idija cuni ñeñaro yigu yiguĭji ĩocũ. Ito bajiro ĩ yija, “Ñe waja ma Jesús ya ruju, ĩ ya rí cuni”, yigure bajiro yami ĩocũ. No ito bajiro yigu seti cutigu yiguĭji. ²⁸ Ito bajiri mani Ɖju ĩ basusare gaye ba ãmorã, mani baroto riojuã, mani idiroto riojuã cuni ado bajiro mani yija quena: Mani ñeñaro yirise tuoĭa bojori bujacõri Diore mani goti rĕtobuja quena. Ito bajiro mani yija bero mani Ɖju godare tuoĭacõri mani baja quena. ²⁹ “Yu ñeñaro yirisere yure waja yi ĩsirocu godaĥi Cristo”, yi mani tuoĭaja quena. Jesure tuoĭamenati rocati mani baja, mani tõbujaroca yigu yiguĭji Dios manire. ³⁰ Ito bajiro rocati bacõri jãjarã ñarise cutia mua. Gãjerã wisia mua. Ito bajicõri gãjerã godaĥi ĩna. ³¹ Mani baroto riojuã queno mani tuoĭaja, mani tõbujaroca yibicu yiguĭji Dios. ³² Mani ñeñaro yirise waja mani tõbujaroca Dios ĩ yija, mani queno yitoni ito bajiro yami ĩ. ĩre masimena jeame ĩjuroju wana rãca mani ãmobeami Dios. Ito bajiri ñeñaro mani yirisere jidicãtoni mani tõbujaroca yami ĩ.

³³ Ito bajiri Jesús ĩ basusare gaye barã wana mua mini-juaja, sigũ ruyabeto corocõ barona ejori mejeti baya yu ñarã mua. ³⁴ Mua ñiocõja, mua minijuaroto riojuã mua ya wiju baja quena. Ito bajiri minijuara wiju mua baja, jairo ba yajirona meje barã yirãji mua. “Ito bajiro mua yijare mua tõbujaroca yibicu yiguĭji Dios”, yi gotia yu muare. Gaje oca ñarisere mua tu ejacõri quenogũ yiguja yu.

12

Jeyaro mani moa masitoni Espiritu Santo manire ĩ jidicãre gaye

¹Queno tuoĩaña yu ñarã mua. Ricati riti mani moa masi sosatoni Espiritu Santo ĩ cũre gaye mua masire ãmoa yu.

²“Jesure mani masiroto riojua mani meni rujeoana busimenare rucubucocũ mani”, yi tuoĩarãji mua. Gajero bajiro tuoĩacõri jãjarã mua meni rujeoanare rucubucobojayija mua maji. ³Ito bajiri, “Ĩna ñama Espiritu Santo rotirise meje busirã. ĩ ñami Espiritu Santo rotirise busigu”, mua yi tuoĩare ãmoa yu. No Jesure busitugu, Espiritu Santo ĩ rotirise meje busiami ĩocũ. No, “Rẽtoro masigũ ñami Jesús yu Uju”, yi busigu, Espiritu Santo rotirise busiami ĩocũ.

⁴Diore mani moa ĩsitoni, ricati riti mani moa masiroca yami Espiritu Santo. Ricati riti mani moa masiroca yibojaguti sigũti ñami Espiritu Santo. ⁵Ricati riti mani Ujũre moa ĩsia mani. Ricati riti moabojarãti ĩ sigũreti moa ĩsia mani. ⁶Ricati riti moare cũni Dios manire. Ito yicõri ĩ sigũti ñami mani moa masiroca yigu. ⁷Espiritu Santo quedi sãja ecoana ñari, Diore mani moa ĩsi masiroca yami ĩ. Ito bajiri, “Espiritu Santo quedi sãja ecorũ ña yu”, yi tuoĩa mani. Gãmeri mani ejabuatonu ricati riti moare cũni Espiritu Santo manire. ⁸Coriarã Espiritu Santona suoriti queno tuoĩacõri goti masiama ĩna. Gãjerã cuni Dios oca josarise gaye riasoticõri goti masiama ĩna, Espiritu Santo ejabuarisena. ⁹“Yu seniro bajiroti cudigu yiguĩji Dios”, gãjerã ĩna queno tuorũnũroca yami Espiritu Santo. Cõrãre ĩna yisio masiroca yami Espiritu Santo gãjerãre. ¹⁰Tiyamani ĩna ĩo masiroca yami Espiritu Santo gãjerãre. Gãjerãre Dios oca ĩna goti masiroca yami Espiritu Santo. “Ĩ ñami Espiritu Santo rotirise busigu. ĩna ñama Espiritu Santo rotirise meje busirã”, ĩna yi masiroca yami Espiritu

Santo gãjerãre. Ìna busi masibiti oca ñabojareti ìna busi masiroca yami Espíritu Santo gãjerãre. Iti gaye oca ìna busigore ìna rogoti masiroca yami Espíritu Santo gãjerãreama. ¹¹ Ricati gaye riti manire moare cûru sîgûti ñami Espíritu Santo. Ì ãmoro bajiro riti ricati mani moa masiroca yami Espíritu Santo.

Co ruju bajiroti ruju cutirã ña mani, yire gaye

¹² Mani ya ruju jeyaro ñabojarocati co rujuti ña. Tite mua. Ìmo, cajea, gãmoro, gubo jaje ña mani ya ruju. Ito bajiro bajirã ña mani Jesucristore tuorûnurã cuni. Jãjarã ñabojarãti Cristore riti tuorûnurã ñari co ruju bajiro bajirã ña mani. Ìre tuorûnurã ñari gãmeri ejabua mani.

¹³ Jeyaro ña mani. Tuote mua. Judio masa, judio masa meje cuni, gãjerãre moa ìsirã, gãjerãre moa ìsimena cuni ña mani. Jesucristore tuorûnucõri idé gu roticu mani. Mani sîgû ruyabeto Espíritu Santo quedì sãja ecoana riti ña mani. Ì sîgûti ñami mani ya usiju quedì sãjaru. Ito bajiri ìna suoriti co ruju bajiroti ruju cutia mani.

¹⁴ Co ruju ñabojaroti jeyaro ña mani ya ruju. Coju gaye meje ña mani ya ruju. Jeyaro ña. ¹⁵ Gubo iti busija, “Ìmo meje ña yua, ito bajiri ruju gaye meje ña”, yibojarocati ruju gayeti ña. ¹⁶ Gãmoro iti busija, “Cajea meje ña yu, ito bajiri ruju gaye meje ña”, yibojarocati ruju gayeti ña iti.

¹⁷ Mani ya ruju cajea bucucagoti iti ñaja, ¿ñena tuoboanada mani? Mani ya ruju gãmoro bucurogoti iti ñaja, ¿ñena wîjiboanada mani? ¹⁸ Meje ado robojua baja. Mani ya ruju iti ñaroto bajiroti ì ãmoro bajiro rujeoñi Dios manire.

¹⁹ Mani ya ruju coju gaye iti ñaja, jeyaro ñabitiboadoja.

²⁰ Ado robojua baja: Mani ya ruju jeyaro ñabojarocati co rujuti ña. Ito bajiro bajirã ña mani Jesure tuorûnurã. Jãjarã ñabojarãti sîgûre bajiro riti tuoïacõri gãmeri ejabua mani.

²¹ Mani ya cajea iti bʉsija, “Ñe waja ma āmo”, yi masibitiboadoja. Mani ya rijoga iti bʉsija, “Ñe waja ma gʉbori”, yi masibitiboadoja iti. ²² Ado robojua bajaia: Mani ya rujʉ gaye, “Adi gaye queno waja ma yʉre”, mani yi tʉoĩabojarocati ñasarise ña iti cʉni. ²³ Mani ya rujʉ gaye, “Adi gaye queno waja ma yʉre”, mani yibojarise cʉni queno tirʉnua mani. Gaje mani ya rujʉ gaye masa jeyarore mani ĩobiti yutabujuna sãña bia mani. ²⁴ Gajejari mani ya rujʉri bojobeja mani. Ito bajiri itire buabeja mani. Mani ya rujʉre ĩāmoro bajiroti quenoñi Dios. Mani ya rujʉ gaye, “Ñasarise meje ña”, mani yirise itijua ña buto bʉsa ñasarise. ²⁵ Mani ya rujʉ jeyaro ñabojarocati corocōti ñasarise ña. Mani Jesure tʉorʉnʉrã ito bajiro bajirãti ña. Jãjarã ñabojarãti ñasarã riti ña mani. Ito bajiri wanʉre rãca gãmeri ejabua mani. ²⁶ Mani ya rujʉ cojʉ iti junija, rujʉ ñarocōti juni wisia. Mani ya rujʉ cojʉ masa ĩna ti wanʉja, mani ya rujʉ ñarocōreti wanʉjeacoa mani. Iti gaye robo bajiroti bajaia mani Jesure tʉorʉnʉrã cʉni. Mani wato sĭgũ ĩ bojori bujaja, mani ñarocōti ĩ rãca bojori bujarãji mani. Ito yicōri sĭgũ mani wato ĩ wanʉ quenaja, mani ñarocōti wanʉ quenarãji mani.

²⁷ Ado robojua bajaia: Mani Jesure tʉorʉnʉrã ĩre moa ĩsirã ñari ĩ ya rujʉ robo bajirã ña mani. Mani sĭgũ rʉyabeto ñasarã ña mani. Mani rãca gagʉ sĭgũ ĩ manija, ĩre godo cʉtia mani cocati Jesure moa ĩsirã ñari. ²⁸ Mani Jesure tʉorʉnʉrã ñaja sĭgũ rʉyabeto moare cʉñi Dios manire. Cajero mani coriarãre Jesús oca goti ucuronare cʉñi ĩ. Ito bero gãjerã ĩre goti ĩsironare cʉñi. Gãjerã ĩ oca riasoronare cʉñi. Gãjerãre tiyamani ĩna ĩrotire cʉñi. Gãjerã cõrãre yisionare cʉñi. Gãjerã ejabuaronare cʉñi. Gãjerã tirʉnʉronare cʉñi. Ito bero gãjerã ĩna bʉsi masibiti oca ñabojareti bʉsi masironare cʉñi Dios. ²⁹ Corocōti ĩre moa ĩsirona meje cʉñi Dios manire. Mani jeyaro

Jesucristo oca gotirona ã cūana meje ña mani. Mani jeyaro Diore goti ãsiri masa meje ña mani. Mani jeyaro ã oca riasori masa meje ña mani. Mani jeyaro tiyamani ãori masa meje ña mani. ³⁰ Mani jeyaro cōri masare yisiori masa meje ña mani. Mani jeyaro mani bŭsi masibiti oca ñabojareti bŭsi masirona meje ña mani. Mani jeyaro ãna bŭsija tŭocōri, “Ado bajiro bŭsirŭ ãna”, yi masirã meje ña mani. Mani jeyaro ãna bŭsirisere rogoti masirã meje ña mani. ³¹ “Ñasarise yŭ yiroca, Dios ã yire ãmoa yŭ”, yirŭja mŭare. Ito bajiro mŭa yijama quena ña. Ito bajiro mŭa yibojarocati adocãta bŭto ñasarisejuare mŭare riasogŭ ya yŭ.

13

Gãjerãre mani ti maija, iti ña ñasarise, yire gaye

¹ Co oca rŭyabeto mani bŭsi masibojarocati, ito yicōri ángel mesa oca mani bŭsi masibojarocati, gãjerãre mani ti maibeja, ñe waja mana ña mani. Gãjerãre mani ti maibeja, jeyaro bŭsirã ñabojarãti, rocati yucŭ toti iti bŭsiro bajiroti, ito yicōri cometiro iti bŭsiro bajiro, rocati oca godacoajŭ. Gãjerãre ti maimenati mani bŭsibojaja manire tŭomenaji ãna. ² Diore goti ãsiri masa ñabojarãti, ito yicōri goti rudire jeyaro masibojarãti, gãjerãre mani ti maibeja, ñe waja mana ña mani. Jeyaro tŭo masirã ñabojarãti, ito yicōri “ ‘Gũta yucŭrire cŭo rŭgõña Dios mŭ’, yŭ yija, ñaro bajiroti cŭdiguŭji ã”, yi tŭoã masirã ñabojarãti, gãjerãre mani ti maibeja, ñe waja mana ña mani. ³ Mani rŭcorise ñarocōti batorã ñabojarãti, gãjerãre mani ti maibeja ñe waja bŭjamenaji mani. “Yŭre ãna soe ãmbojarocati Dios oca goti jidicãbicŭja yŭ”, yi tŭoãrã ñabojarãti gãjerãre mani ti maibeja ñe waja bŭjamenaji mani.

⁴ Gãjerãre mani ti maija, ado robojua bajirã yirãji mani: Gãjerãre usirioro yimenaji mani. Gãjerãre queno yirã yirãji mani. Gãjerãre ti uomena yirãji mani. Gãjerãre rucubworã yirãji mani. “Gãjerã rëtoro ñasagu ña yu”, yimenaji mani. ⁵ Mani queno ñaroti gaye riti tuoïamena yirãji mani. Gãjerãjware ñna queno ñaroti gaye tuoïarã yirãji mani. Gãjerãre ti junisinimena yirãji mani. Gãji manire ñeñaro ï yibojarocati yoari junisinimenaji mani. Itire acabojorã yirãji mani. ⁶ Gãji ï ñeñaro yija, ti wanu-menaji mani. Gãji ï queno yijajua ïre ti wanurã yirãji mani. ⁷ Gãjerãre mani ti maibojarocati ñeñaro manire ñna yija, ñnare ti mai jidicãmenaji mani. Ito yicõri ñnare busitumenaji mani. Ñnare mani ti maija, ñnare tuorũnurã yirãji mani. Gãjerãre mani ti maibojarocati, manire ñna ñeñaro yija, ñnare usiriomenaji mani. Ito yicõri ñnare ti mai jidicãmenaji mani.

⁸ Gãjerãre mani ti maija, ñnare ti mai jidicãre ma manire. Ñnare ti maisotirã yirãji mani. Gãjerãre mani ti mairise jedirise meje ña. Co rumu Dios ï manire moare cüre jediro yiroja. Iti rumu iti ejaja Diore queno masirã yirãji mani. Ito bajiri ïre goti ïsire mano yiroja ïja. Ito yicõri mani masibiti oca jeyaro mani busiroca yibicu yiguïji Dios. Gaje ï oca josarisere mani goti masiroca yibicu yiguïji ï ïja. ⁹ Ado robojua bajaia: Adocãta jeyaro Dios ye masi jeobea mani. Dios ocare goti jeo masibebea mani. ¹⁰ Ija co rumu Dios gayere masi jeocõrã yirãji mani maji. Ito bajiri iti rumu ejaroca ï oca manire goti rëtohuri masa mana yirãji ïja. Manimasiti tuo masi jeocõrã yirãji.

¹¹ Ado bajiro bajaia. Masucã yu ñaja, masucã oca basicu yu. Masucã yu ñaja, masucã robo riti tuoïacu yu. Masucã yu ñaja, masucã bajiro riti tuoïa besecu yu. Busua wacu masucã yu ñagore gaye jidicãcu yu.

¹² Adocãta jeyaro Dios gayere tuo masi jeobea mani. Eoro

queno ruyubeto bajiro Dios oca queno tuo masi jeobea mani. Ito bajibojarocati co rumu Dios tu ejacõri i gayere tuo masi jeorã yirãji mani. Adocãta coriajuriti i oca masia mani. Ija co rumu Dios i manire ti masi jeoado bajiroti i gaye tuo masi jeorã yirãji mani cuni.

¹³ Udiaji gaye ña mani yisotiroti: Diore tuorũnusotiruja manire. “Dios i yiro bajiroti yigu yiguji”, yi tuoasotiruja manire. Ito yicõri gãjerãre ti maisotiruja manire. Iti udiaji gaye gãjerãre mani ti mairise iti ña ñasarise.

14

Oca masibitibojarãti gãjerã oca busire gaye

¹ Gãjerãre ti maisotiruja manire. Iti ña mani cãdiroti ñasarise. Ire mani moa isitoni Dios i cãre gayere ãmoana mani. “Yure goti isiri masa ñama muu”, manire i yire gaye, ãmoana mani. Iti cuni ñasarise ña. ² No gãjerã oca i masibiti i busija, Diore rucubuguti yami, ito bajiro i yija. Ito bajiro i busija, masa tuomenaji ire. Ito bajiri ñnare meje busiguji i. Diojuare busiguji. Ito bajiro i busija Espiritu Santo ejabuarisena busiguji i. Ito yicõri gãjerã ñna tuoroti meje busiguji i. ³ Gãjiama Diore goti isigũ i busija, masareti busiguji. Buto busa Diore ñna tuorũnutoni ito bajiro busiguji i. Ñna tuoia oca seotoni ito yicõri ñna wanutoni ito bajiro busiguji i. ⁴ No gãjerã oca i masibiti Diore i busija, buto busa ñmasiti Diore masi waguji. Ito bajiro tuoyamani i busija, tuobiticõri buto busa Diore masimenaji ñna ija. Gãjiama Dios oca gotigu ñna tuorisena i gotija tuocõri, gãjerã Jesure tuorũnurã buto busa ñna tuorũnuroca yami i.

⁵ Sigũ ruyabeto gãjerã oca muu masibiti oca ñabojareti muu busija, quena ñaboroja yure. Ito bajibojarocati i masibiti oca ñabojareti busigu rêto busaro ñasarise moami Dios oca gotiri masu. I masibiti oca ñabojare busigu i

bʉsirise masa ʉna tuo masitoni ʉ rogotija, ʉnasarise moami ʉ cʉni. Ito bajiro ʉ yija Jesure masirā bʉto bʉsa ʉre ʉna tuorʉnʉ waroca yami ʉ. Bʉsi tʉocōri ʉ rogotibejama tuo masimenaji ʉna. ⁶ Tuoya yʉ ʉnarā mua. Mua tu ejaçōri mua tuobiti yʉ bʉsija, ʉne waja ma. ʉejua ejabuabetoja muare. Yʉ masiroca Dios ʉ yirise muare yʉ bʉsija, muare ejabuaroja itiama. Dios oca riojo ʉnasarise muare yʉ riasoja, iti cʉni muare ejabuaroja.

⁷ Goti masiore ocana muare gotigu ya yʉ: Sīgũ tērorā ʉ juti masibeja, “Iti basa menigũ yami”, yi masimenaji mani. Arpa wame çʉtirisena queno ʉ basa meni masibeja, “Iti gaye basa menigũ yami”, yi masimenaji mani. ⁸ Surarare jigũ trompeta wame çʉtirica queno ʉ juti masibeja, gājerā rāca gāmeri sīarona ʉna yucāmenaji ʉna. “Wadirʉ ʉna”, yi masibiticōri ʉna yucāmenaji ʉna. ⁹ Ito bajiroti bajaia, gājerā oca mua masibiti mua bʉsibojaja. Mua masibiti mua bʉsija tuo masibiticōri, “Ito bajiro yireoni ʉna”, yi masimena yirāji gājerā. Ito bajiro mua bʉsibojaja, mino bajiroti godacoaro yiroja. ¹⁰ Riti ʉna, adi macārʉcūrore jaje oca bʉsia mani. Mani bʉsirisere tuorā yirāji gājerā. ¹¹ Ito bajibojarocati sīgũ yʉ tuobiti yure ʉ bʉsibojaja jua dʉja gāmeri tuomenaji gua. ʉre tuo masibiticōri, “Gaje masʉ ʉnaguĩji”, yi tuoĩagũ yiguja yʉ. Yure tuo masibiticōri ito bajiroti tuoĩagũ yiguĩji ʉ cʉni. ¹² Diore moa ʉsiroca Espiritu Santo ʉ yire āmorā ʉna mua. Ito bajiro āmorā ʉnari, “Gājerā Jesure tuorʉnʉrāre gua ejabuaroça yiya”, yirona Espiritu Santore seniña.

¹³ Ito bajiri sīgũ gājerā oca ʉ masibiti ʉ bʉsija, ʉ rogoti masitoni Diore ʉ seniña quena. ¹⁴ Diore rʉcʉbuogu gaje oca yʉ masibiti yʉ bʉsija, Espiritu Santo ʉ ejabuarisena ito bajiro bʉsiguja yʉ. Ito bajibojarocati, “Iti gayere bʉsia yʉ”, yi masibicuja yʉ. Ito bajiri gājerā ʉna tuo masiroca yi masibicʉ yiguja yʉ. ¹⁵ Ado bajiro juaji gayena Diore

yü busija quena. Espíritu Santona suoriti yü masibiti oca ñabojareti Diore yü busija quena. Ito yicõri gãjerã ñna tuotoni ñna tuorisena Diore yü busija quena. Juaji gayena Diore yü basaja quena. Espíritu Santona suoriti yü masibiti oca ñabojareti Diore yü basaja quena, ito yicõri gãjerã ñna tuorisena Diore yü basaja quena. ¹⁶ Diore rücbuorã Espíritu Santona suoriti gãjerã ñna tuobiti riti mani busibojaja, “Iti gaye busirãji ñna”, yi masimenaji ñna. Ito bajiri ñna tuobeja, mani rãca cocati Diore rücbuo masimenaji ñna. ¹⁷ Manire tuobiticõri mani rãca cocati, “Queno ya Dios mü”, yi masimena yirãji ñna. Diore rücbuorã, “Queno ya Dios mü”, mani queno yibojarocati, manire tuobiticõri buto busa Diore masibiti warã yirãji ñna. ¹⁸ Mña rëtoro gãjerã oca yü masibiti busia yü. Ito bajiri, “Queno ya Dios mü. Yü masibiti oca ñabojareti yü busiroca ya mü”, ya yü ñre. ¹⁹ Ito bajibojarocati Dios ya wi minijuacõri jaje müa tuobiti yü gotibojaja, ñe waja ma iti. Yü gotirisere tuomenaji müa. Müa ocana müa tuorise jabetacã yü gotibojarocati müa tuoja, iti ña yüre buto busa quenarise.

²⁰ Rãca bajiro tuoïabesa yü ñarã müa. Ito bajibojarocati mutarãcã ñeñaro yibitiana bajiro müa ñaja quena. Bucurã bajiro queno müa tuoïaja quena. Bucurã müa ñajare, ito bajiro tuoïaja quena. ²¹ Dios oca tuti iti gotija, ado bajiro gotia: “Yü ñarãre gaje ocana ñnare busigu yigüja yü. Gaje masa yü ñarãre gaje ocana busironare cõagü yigüja yü. Ito bajiro yü yibojarocati yüre tuorünümena yirãji ñna”, yi gotia Dios oca tuti. ²² Diore ñna tuo âmobeto bajiroti tuo âmomenaji Jesure tuorünümena cüni. Sigü gãjerã oca ñ masibiti ñ busiroca Dios ñ yija, “Masigü ñari manire waja senigü yiguïji Dios”, Jesure tuorünümena ñna yitoni ito bajiro ñoguïji Dios. Gãjiama ñ oca goti masiroca Dios ñ yija, “Masigü ñari manire ejabuagu yiguïji Dios”,

Jesure tuorũnurã ãna yitoni ito bajiro ãoguĩji Dios. ²³ Ado robojua bajia: Diore rũcũbuorona minijua ñaraju, gãjerã oca mua masibiti mua busi ñaroca Dios ocare riasotimena, ito yicõri Diore tuorũnumena cuni ãna ejaja, “Mecari masaguti ñacõyijari ãna”, yirã yirãji ãna muare. ²⁴ Diore rũcũbuorã mua minijua ñariju gãjerã Diore masimena ãna ejaja, Dios oca mua gotijama tuo masirã yirãji. Ito bajiri queno tuo masicõri, “Ñeñaro yigugo ñada yu cuni”, yi tuoĩarã yirãji ãna. ²⁵ “Yu tuoĩa rudibojarisere masicõami Dios”, yirã yirãji ãna. Ito yicõri Diore rũcũbuorona rijomunigãna ñini rũjũrã yirãji ãna. “Ãna rãca ñasacõami Dios”, yirã yirãji ãna muare.

Minijuacõri ado bajiro queno yirũja manire, yire gaye

²⁶ Tũoya yu ñarã mua. Ado bajiro bajia: Mua coriarã minijuacõri basa ãmoa mua. Gãjerã riaso ãmoa mua. Gãjerã mua masiroca Dios ã yirere goti ãmoa mua. Mua coriarã gãjerã oca mua masibitire busi ãmoa mua. Gãjerã rogoti ãmoa mua. Quena ña ito bajiro mua yija. Dise ruyabeto mua yisotija, Diore tuorũnurã buto busa ãna tuorũnu waroca mua yija quena. ²⁷ Gãjerã oca mua masibiti mua busi ãmoja, jũarãona udiarãonati mua busija quena. Sĩgũ ã busija bero, ito bero gãji, ito bero gãji mua busija quenaroja. Mua busija bero gãji ã rogotija quena, gãjerã ãna tuotoni. ²⁸ Sĩgũ rogotigu ã manija, minijuacõri gãjerã oca mua masibiti busibitirũja muare. Sĩgũ rogotigu ã manija, masa ãna tiro riojo meje mua busija quena. Mua tuoĩarisena Diore mua busija quena. ²⁹ Mua masiroca Dios ã yire mua goti ãmoja, jũarãona, udiarãonati busija quena. Sĩgũ ã busija bero, ito bero gãji, ito bero gãji busija quena. Gãjerã muare tuo rujirã, “Riti Dios ocare busiama ãna”, yi tuoĩa bese rujirã yirãji ãna. ³⁰ Sĩgũ ã busiroca gãji tuo rujigure ã busiroti gaye tuoĩa bujaroca Dios ã yija, busisugũ busi jidicãja quena, gãji ã busitoni. ³¹ Queno

1 CORINTIOS 14:32 431 CORINTIOS 14:40

gãji bero, gãji bero mua busija, mua Diore goti ïsiri masa sigũ ruyabeto busi masirã yirãji mua. Ito bajiro mua yija, sigũ ruyabeto busi masirã yirãji mua. Ito bajiro mua yija, buto busa Dios ocare masicõri tuoïa oca sêo wanu jedirã yirãji mua. ³² Mua Dios oca goti ïsiri masa ï oca mua gotija, rocati meje gotirã yirãji mua. “Ado bajiro goticuja yu”, yi tuoïacõri mua gotija quena. Gãjerã ïna busiroca busibitiruja mware. Mua yuja quena. ³³ Ñe oca manoti mani minijuaja ticõri, manire wanugũ yiguïji Dios. Ito bajibojarocati mani busi riawusaja ticõri, wanubicu yiguïji Dios.

Ito bajiri gãjerã Jesure tuorũnurã ïna minijuado bajiro, ñe oca mano busi riawusare mano mua minijuasotija quena. ³⁴ Dios ya wi mua minjuaroca busire ma romiare. ïna ñama ïna manujusabatiare cudirona. Ëmua ñama ïnare ïmatãrã. Ito bajiroti gotia Dios oca tuti. ³⁵ ïna seniãa ãmoja, ïna ya wiju tãdi ejacõri ïna manujusabatiare seniãaja quena. Mua minijuari wiju romio sigõ iso busija, queno ejasabea.

³⁶ “Ado bajiro gotia Dios oca”, yi goti rêtobu masirã ña gua”, ¿yi tuoïati mua? Ito bajirojua meje baja. Mua riti meje ña Dios oca boca ãmisuana. ³⁷ “Diore goti ïsiri masu ña yu”, sigũ ï yija, “Mani Ëju ï rotiado bajiroti gotiami Pablo”, yi masigũ yiguïji ï. Ito bajiroti yigu yiguïji gãji cuni, “Espiritu Santo rotirise busia yu”, ï yi masija. ³⁸ “Dios oca gotigu meje ñami Pablo”, sigũ ï yija, ïre cuni tuorũnabeja quena.

³⁹ Tuoya yu ñarã mua. Ado bajirojua mua yija quena: “Dios oca yu goti masiroca ï yire ãmoa yu”, mua yija quena. No gãjerã oca ïna tuobiti ïna busija, rëore ma. ⁴⁰ Ito bajibojarocati mua minijua ñari wiju gãjerãre rucubucõri sigũ ï busiroca gãjerã busire ma. No

mua yisotirise dise ruyabeto queno tuoĩacõri mua busija quena.

15

Mucana tudi Cristo catire gaye

¹ “Masare masorocũ goda ĩsiĩni Cristo”, yi muare yũ riasocatire itire tudi mua tuoĩare ģmoa yũ. Iti ocare iti rumũjũ boca ģmicĩcũ mua. Iti ocare boca ģmicõri Cristore tuorũnũa mua. ² Muare yũ riasocatire mua tuorũnũ jidicĩbeja, Dios ĩ masoana ña mua ĩja. “Dios ocare tuorũnurĩ ña gua”, yibojarĩti iti ocare queno tuorũnusamena mua ñaja, Dios ĩ masoana meje ña mua.

³ Oca bũto ñasarise yũ masiroca Dios ĩ yirere muare riasocũ yũ. Dios oca tuti iti gotiro bajiroti, “Mani ñeñaro yirise waja goda ĩsiĩni Cristo”, yi muare riasocũ yũ. ⁴ “Īre ĩna yujebojarocati udia rumũ bero mucana tudi catiĩni Cristo”, yi muare riasocũ yũ. Dios oca tuti iti gotiro bajiroti muare riasocũ yũ. ⁵ Tudi caticõri Pedrore goaĩoyijũ Jesús. Ito bero ĩ cũana jũa gũbojeno ñarĩre goaĩoyijũ. ⁶ Ito bero gĩjerĩ quinientos ñarĩ rĩto busaro ĩre tuorũnurĩre goaĩoyijũ Jesús. Ī goaĩoana jĩjarĩ catiama maji. Gĩjerĩma godacoaĩni. ⁷ Ito bero Santiagore goaĩoyijũ. Ito bero ĩ oca goti ucutoni ĩ cũanare ñarocõreti goaĩoyijũ.

⁸ Īnare ĩ goaĩoja bero yũre cũni susari goaĩoquĩ. Īna bajiro ñasagũ meje ña yũ. Ñasagũ meje yũ ñajare ĩna bero yũre cũni goaĩosusaquĩ ĩ. ⁹ Ī oca goti ucuroña ĩ cũana rĩca corocõ ñasagũ meje ña yũ. Iti rumũ Cristore tuorũnurĩre queno yibiticũ yũ maji. Ī ñarĩre yũ usirioro yi codejama ĩ oca yũ goti ucuroca yibitiborũ Dios. “Queno yũ yigũ ñajare yũre beseĩni Dios”, yi tuoĩabea yũ. ¹⁰ Yũre ti maicõri yũre beseĩni Dios, ĩre yũ moa ĩsitoni. Quenoguti Dios ĩ yũre yijare ĩre queno moa ĩsia yũ. Ito bajiri, “Bũjato bajia. Īre besebojacũ yũ”, yibeami Dios yũre. Gĩjerĩ Jesús ĩ cũana

rêto busaro Diore moa ísia yu. Ito bajibojarocati yumasi meje Diore moa ísia yu. Yure ti maicõri ãre yu moa ísi masiroca yami Dios yure. ¹¹ “Gãjerã rêto busaro Dios oca muare riasocu yu”, yu yija no yíbea iti. Ado robojua ña ñasarise. Dios ocare tuocõri Jesure tuorũnyija mua. Itijua ña ñasarise.

Godabojarãti mucana tũdi mani catire gaye

¹² Gua Jesús ã cũana sũgũ ruyabeto corocõ gotia gua. “Godabojaguti mucana tũdi catiĩi Cristo”, yi gotia gua. Muare ito bajiro gua yibojarocati, ¿no yija mua coriarã, “Godabojarãti mucana tũdi catiya ma”, yati mua?

¹³ Godabojarãti tũdi catire iti manija, Cristo cuni tũdi catibitiboru. ¹⁴ Tũdi ã catibeja, ã oca gua riasobojarise ñe waja manija. ã tũdi catibeja, ãre tuorũnubojarãti ya mua. ã manija ã manibojarocati ãre tuorũnuboana mua. ¹⁵ ã tũdi catibeja, burãti Dios oca riasoboyija gua. “Tũdi Cristo ã catiroca yiĩi Dios”, yicãcu gua. Godana mucana tũdi ãna catibeja, Jesure cuni tũdi ã catiroca yibitiboru Dios.

¹⁶ Godana mucana tũdi ãna catibeja, ito bajiroti Cristo cuni tũdi catibitiboru. ¹⁷ Cristo tũdi ã catibeja, ãre tuorũnubojarãti ya mua. ã manija ã manibojarocati ãre tuorũnuboana mua. Mani ñeñaro yirise waja, waja yi ãsirocu godacõri ã tũdi catibeja, seti cutirã ñaboana mani maji. ¹⁸ Ito bajiro iti bajija, Jesucristore tuorũnucõri godana jeame ãjuroju waboana ãna. ¹⁹ Cristore tuorũnubojarãti tũdi mani catibeja, ãre tuorũnumena rãtoro bojori bujarã ñaboana mani.

²⁰ Ado robojua bajia: Cristo ã godabojarocati mucana tũdi ã catiroca yiĩi Dios ãja. Ito bajiri ã ñami cajero godabojaguti mucana tũdi catisuoru. ãna suoriti godana ñarocõti mucana tũdi cati jedirã yirãji. ²¹ Adán ñayoru ã ñeñaro yirajuna suoriti godasuoĩi adi sita gãna. Ito bajibojarocati Cristo tũdi ã catirajuna suoriti godabojarãti tũdi

catirãji mani cuni. ²² Adán ñayoru janerãbatia ñari goda jedirã yirãji mani. Ito bajibojarocati Cristore tuorũnurã ñari ñna suoriti mucana mani catiroca yigu yiguĩji Dios. ²³ Dios ã amoro bajiroti mucana tãdi catirã yirãji masa. Cristo ñami cajero godabojaguti mucana tãdi catisoru. Ija Cristo ã tãdi ejaroca ãre tuorũnũgoana mucana tãdi catirã yirãji. ²⁴ Ito baji ñaroca adi umuuri jediro yiroja. ã wajana ñarocõreti rãtocũgũ yiguĩji Cristo. Adi sita gãna ujarã, ito yicõri umacũju gãna ujarãre cuni rãtocũgũ yiguĩji Cristo. Ito bajiro yicõri ãre tuorũnurãre miojugu yiguĩji Cristo. “Ëna Uju ñasagu ñatĩñama mu”, yirocu ã Jacu Diojuare ãsigũ yiguĩji Cristo ãre tuorũnũgoanare. ²⁵ ã wajanare ã rãtocũroto riojua Uju ã ñaroca yigu yiguĩji Dios Cristore. Ito bajiro ã baji ñare amoguĩji Dios. ²⁶ ã wajana ñarocõreti rãtocũcõri masa ñna godarise gaye itocõti gajanoagũ yiguĩji Cristo. Ito bajiri mucana tãdi godare mano yiroja. ²⁷ Dios oca tuti iti gotiro bajiroti jeyaro Uju ñarocãre cũni Dios Cristore. “Ë Jacu Uju ñami Cristo”, yireoni meje ña iti. ã Jacujua jeyaro Uju ñarocãre cũni. ²⁸ Co rumu ã wajana jeyarore, ito yicõri ujarã jeyarore cuni ñnare rãtocũgũ yiguĩji Cristo. Ito bajiro yicõri jeyarore rotigu ñagũ yiguĩji Cristo. Iti rumuti ã roti masitoni Dios ã jidicãrere tãdi ãsigũ yiguĩji Diore. Ito bajiro ã yijare Dios ãre cũru jeyaro, dise ruyabeto Uju ñagũ yiguĩji.

²⁹ “Godana mucana tãdi catimenaji”, gãjerã ñna yibojarise gaye muare goti masio amoa yu. ¿No yija, “Godana mucana tãdi catimenaji”, yi tuoĩabojarãti idã guya mana godanare yiari idã gu ãsirã yati gãjerã? Godana mucana tãdi ñna catibejama, rocati bajiro ñnare idã gu ãsibojarãji ñna.

³⁰ Dios oca yu riasoja, buto guijosotia yure, jãjarã yure sã amora ñna cunijare. “Riti godana tãdi catirã yirãji ãja”, yi tuoĩacõri Dios oca riaso jidicãbea yu. ³¹ Riti

mũare gotia yũ ñarã yũ. Co rũmũ ruyabeto yũre sĩa ãmorã cãnísotiana ña. Riti baja ita. Gaje riojo gotia yũ mũare. “Yũ riasocatire tũocõri Cristore tũorũnũñi Corinto cuto gãna”, yi mũare tũoĩacõri wanũa yũ. ³² Efeso cuto gãna yaiare bajiro guacõri yũ tũbũjaroca yicã ña. Godabojarãti mũcana tũdi mani catibeja, rocati Diore moa ãsibocũ yũ. Ito yicõri tũbũjabojaguti, ñe bũjabitibogũja yũ. Godana mũcana tũdi ña catibeja, Jesure tũorũnũmena ña tũoĩado bajiro mani cũni tũoĩaja quenaboã. Ado bajiro yi tũoĩama ña: “Yoari mejeti godarã yirãji mani. Ito bajiri mani ãmoro bajiroti wanũrũja mani, barũja mani, idirũja mani”, yi tũoĩabojama ña.

³³ Ito bajiro rũo gotirãre tũorũnũbesa. Ado bajirojũa ya yũ mũare: “Ñeñaro yirã rãca mũa baba cutija, queno yirã ñabojarãti ña bajiroti ñeñaro yirã yirãji mũa cũni”, ya yũ mũare. ³⁴ Tũdi queno tũoĩa quenocõri quenarise riti yiya mũa. Mũa ñeñaro yirisere jidicãña. Mũa coriarã Diore masirã meje ña mũa. Mũa bojo bũjatonu ito bajiro ya yũ.

Godabojarãti mũcana tũdi ña catire gaye

³⁵ Ado bajiro yũre seniĩarã yirãji gajea coriarã: “Godana ñabojarãti, ¿no bajiro tũdi catirã yirãjida? Ito yicõri, ¿no bajiro rujũ cutirã yirãjida ña?” yi yũre seniĩarã yirãji gajea coriarã. ³⁶ Ito bajiro yũre seniĩarã queno tũoĩamena ñama ña. Ado robojũa bajia: Aje mani oteja, joe gayeti jogaro yiroja. Ito bajibojarocati gũdajubero gaye judi mũjaroja. ³⁷⁻³⁸ Trigo ajeri, gaje ote ajeri mani oteja, rujagũ meje otea mani. Mani oteja bero rujagũ ita ñatoni Dios ã ãmoro bajiroti menigũ yiguĩji ã. Ote ajeri ita ñaro bajiroti ita judiroca yigũ yiguĩji Dios. Maniama ajerigoti otea mani. Dios ñami ita judiroca yigu. ³⁹ Mani catirã jeyaro ricati riti rujũ cutia mani. Tite mũa. Wai, waibũcũrã, wũtirã, mani masa cũni ricati riti rujũ cutia.

⁴⁰ Ito bajiroti ũmacũju gãna cuni ricati ruju cutirãji. Mani adi sita gãna ricati ruju cutia mani. Mani adi sita ñarã quenari ruju, ruju cutia mani. Ũmacũju gãna cuni manire bajiro ruju cutibitibojarãti quenari ruju, ruju cutirãji ña cuni. ⁴¹ Ũmua gagu ĩ busurise bajirise meje busuami ñami gagu cuni. Ricati busuami. Ito bajiroti ñocõa cuni ricati busuama. Ña ñocõa comasi cuni ricati riti busuama. ⁴² Ito bajiroti bajirã yirãji mani. Godabojarãti mucana tũdi caticõri ricati ruju cutirã yirãji mani. Sĭgũ godarure mani yujeja, ĩ ya ruju jogacoaro yiroja. Tũdi catiroca Dios ĩ yija, tũdi godare mano yiroja ĩre. ⁴³ Sĭgũ godarure mani yujeja, jogari rujure yujea mani. ĩ tũdi catiroca Dios ĩ yija, seyori ruju, ruju cutigu yiguĩji. Queno ruju sĕogũre meje yujea mani. Rujũ sĕobiti ruju yujea mani. Ito bajibojarocati tũdi catiroca Dios ĩ yija, sĕori ruju, ruju cutigu yiguĩji ĩ. ⁴⁴ Adi sita ñarã mani ruju cutirisere ña yujeja, jogari rujure yujerã yirãji ña. Ito bajibojarocati mani tũdi catiroca Dios ĩ yija, jogabiti ruju bujarã yirãji mani. Adi sita ñarã jogari ruju, ruju cutia mani. Mani godabojarocati mani ya usiama godabetoja. Ũmacũju Dios tu ejacõri jogabiti ruju, ruju cutirã yirãji mani.

⁴⁵ Ado bajiro gotia Dios oca tuti: “Cajero ũmugũ ñasurũ, Adán ñayoru Dios ĩ rujeoru ñayiju. ĩ catiroca yiyiju Dios”, yi gotia Dios oca tuti. Adán bero gagu ñabojaguti ĩ rĕtoro ñasagu ñami Cristo. ĩ ñami mani catitĩnaroca yigu. ⁴⁶ Adocãta mani ruju cutirise jogari ruju ña. Ito bajibojarocati ũmacũju Dios tu ejacõri jogabiti ruju bujarã yirãji mani. ⁴⁷ Ũmugũ ñasurure sitana rujeoyiju Dios. Ito bajiri adi sita gagu ñayiju ĩ. ĩ bero gagu Cristoama ũmacũju gagu wadirũ ñayiju. ⁴⁸ Adi sita ñarã cajero ñasurũ sitana rujearu robo bajiro ruju cutia mani. Ũmacũju Dios tu mani waja ito gagu wadirũ Cristo robo bajiro ruju cutirã yirãji mani. ⁴⁹ Adi rumari Adán ñayoru

bajiro ruju ćutia mani. Ito bajibojarocati Dios tu ejacõri Cristo bajiroti ruju ćutirã ñarã yirãji mani ija.

⁵⁰ Ado bajiro goti ãmoa yu ñarã yu muare: Adocãta mani ya ruju wiro, rí ćuni ña manire. Ito bajiri ruju ũmacũju Dios ĩ rotiroju ña masibetoja. Adocãta mani ruju ćutiri ruju yoari ñabetoja. Ito bajiri Dios rãca catitĩñarona ruju jogabiti ruju mani ruju ćutija quena. ⁵¹ Gãjerã ĩna masibitire muare gotigu ya yu. Jeyaro meje godarã yirãji. Ito bajibojarocati mani sĳgũ ruayabeto ruju wasoarã yirãji mani. ⁵² Cajea mani yabi yiro bajiro ejaroti rujure wasoagu yiguĩji Dios. Ito bajiro bajiro yiroja sũsari rũmũ. Trompeta wame ćutirica jutiraga oca ruyuro yiroja. Iti oca ruyuroca godana tũdi catirã yirãji. Ito yicõri tũdi godare mano yiroja ĩnare. Iti rũmũri cati ruayarãre ĩna ya rujũrire wasoagu yiguĩji Dios. ⁵³ Mani ruju ćutirise jogarise ña. Ito bajiri Dios rãca mani catitĩñatoni manire ruju wasoagu yiguĩji Dios. Adocãta mani ruju ćutirise godacoaro yiroja. Ito bajiri tũdi mani godabititoni mani ya rujure wasoagu yiguĩji Dios. ⁵⁴⁻⁵⁵ Adocãta mani ruju ćutiri ruju godacoaro yiroja. Mũcana tũdi godabiti ruju Dios ĩ manire wasoaja, Dios oca tuti iti gotiado bajiroti rẽtaro yiroja. Ado bajiro gotia iti: Mani godarise jediroca yami Dios ija. Ito bajiri mũcana tũdi godamenaji mani. “Tõbũjacõri goda wacu ya yu”, yi tuoĩa güire ma ija. ⁵⁶ Ñeñaro yisotirã ñari godarã yirãji mani. Dios ĩ rotirisere ćudimena ñari, “Ñeñaro yirã ña gua”, yi tuoĩa mani. Ñeñaro mani yirisere mani coe rotibeja godacõri, buto tõbũjarã yirãji mani. ⁵⁷ Ito bajibojarocati mani Ŭju Jesucristore mani tuorũnũja, ĩ godarena suoriti jeame ũjũroju mani waborere rẽtogũ yiguĩji Dios. Godabojarãti caticoarã yirãji mani. Itire tuoĩa wanũcõri, “Queno ya Dios mũ”, ya mani.

⁵⁸ Ito bajiri Jesucristore tuorũnu jidicãbitirũja yu ñarã manire. Ito yicõri ĩre moa ĩsi jidicãbitirũja manire. “Īre

mani moa ĩsija queno manire waja yigu yiguĩji Dios”, yi tũoĩa mani. Ito bajiri mani Ujũre mani moa ĩsija rocati meje moarã yirãji mani.

16

Gãjerãre ejabũ arona mani niyeru miojũre gaye

¹ Gãjerã Jesure tuorũnurãre ejabũarona niyeru mũa miojuroti gaye mũare busigu ya yũ adocãta. Jesure rũcũbũorona ĩna minijua ñaroca, Galacia sita gãnare niyeru yũ mioju rotiado bajiroti mũare cũni niyeru mioju rotia yũ. ² Ado bajiro mũare mioju rotia yũ: Coji tujacãra rũmũ ruyabeto mũa bũja sosaro bajiroti jabetacã ĩsija quena. Itire miojucõri cojuti seoba. Ito bajiro mũa yija, yũ ejari rũmũ ñacãro yiroja. ³ Mũa tũ ejacõri niyeru ãmi warona mũa beseanare, “Jerusalén gãnare niyeru ĩsitẽna”, yirocũ ĩnare wa rotigu yiguja yũ. Ito bajiri mũa miojũre gaye ãmi wacõri ito gãna Jesure tuorũnurã bojoro bũjarãre ĩsirã yirãji ĩna. “Ãna ñama queno yirã. ĩnare boca ãmiña mũa”, yi papera uca ĩsigũ yiguja yũ Jerusalén gãnare ĩna ĩo ejatoni. ⁴ “Ĩna rãca warũja yũre”, yũ yi tũoĩaja, ĩnare ũmatã wacũ yiguja yũ.

Warocũ Pablo ĩ tũoĩare gaye

⁵ Adona wacõri Macedonia sitaju ejagu yiguja yũ. Itona wacõri mũa cuto Corintoju ejagu yiguja yũ. ⁶ Yoari mũa rãca ñagũ yiguja gajea yũ. Juebucũ ñarocõti mũa rãca ñagũ yiguja gajea yũ. Ito bero gaje cuto yũ wa masitoni yũre mani gaye yũre mũa ĩsi ejabũaja quena ñaroja yũre. ⁷ Ejori oca mũa tũ ti rẽta ãmobeja yũ. Mani Uju ĩ ãmoja, yoari mũa tũ ña ãmoja yũ. ⁸ Ito bajibojaguti coji wabea yũ maji. Adi cuto Efeso, iti Pentecostés basa iti rẽtaja bero wacũ yiguja yũ. ⁹ Ado ñacõa ãmoja yũ maji. Jãjarã yũre ti tudirã ñabojarãti, Dios oca yũ riasoja jãjarã ñama queno tũo ãmorã.

¹⁰ Timoteo mua tu ĩ ejaja, queno boca ãmima ĩre. Mua rãca ĩ wanutoni, ĩ tuoĭa oca jaibe yirona, queno ĩre boca ãmima. Mani Hjure moa ĩsigũti ñami ĩ cuni, yu robo bajiroti. ¹¹ Ito bajiri ĩre mua rucubure amoa yu. ĩre bocatia yu, ito yicõri Jesure tuorũnurã ĩ rãca gãnare cuni. Ito bajiri mua tu ĩ ejaja, ĩre ejabuaya, yure rãta tigu ĩ ejatoni.

¹² Mani yagu Apolosre gãjerã Jesure tuorũnurã rãca ĩre josabojacu yu, mua tu ĩ tigu watoni. Ito bajiro yu yibojaro-cati “Adocãta yu ware amoguĭji Dios”, yi tuoĭabeami maji. Ito bajiri, “Yu ware quena”, ĩ yi tuoĭari rumu mua tu tigu wacu yiguĭji ĩ.

Quenajaro masa, Pablo ĩ yi ñucare gaye

¹³ Queno tuoĭacõri ña yucãña mua. Ito yicõri mani Hju Jesucristore tuorũnu jidicãbesa mua. Umua seyoro queno mua usi cuti ñaja quena. Ito yicõri tuoĭa oca sãoña mua. ¹⁴ Dise ruyabeto Diore mua moa ĩsisotirise gãjerãre ti maicõri ĩre moa ĩsija quena.

¹⁵ Acaya sita gagu Estãfanas ĩ ñarã rãca cajero Dios oca yu riasocatire boca ãmisuoquĩ ĩ. “Ito bajiroti bajicu”, yi tuoĭarãji mua. Adi rumuri gãjerã Jesure tuorũnurãre ejabuarona Diore moa ĩsirã yama ĩna. ¹⁶ ĩnare mua rucuburo cudire amoa yu. Ito yicõri no ĩna bajiro Diore moa ĩsicõri mua rãca moarãre mua rucuburo cudire amoa yu. ¹⁷ Mua ñarã Estãfanas, Fortunato ito yicõri Acaico ĩna ejaja buto wana yu. Sõju ñacõri yure ejabu masibea mua. Ito bajiri muare yiari yu tu ejacõri yure ejabuama ĩna. ¹⁸ Mua oca sãoroca ĩna yiado bajiroti yu tu ejacõri yu oca sãoroca yama ĩna. Ito bajiro yirãre mani rucuburoja quena.

¹⁹ Asia sita gãna Jesure tuorũnurã, “Quenajaro”, yi ñucama muare. Aquila ĩ manojo Priscila ĩna ya wi minijuarã cuni mani Hjure tuorũnurã ñari, “Quenajaro”, yi ñucama

ĩna mũare. ²⁰ Ado gãna manire bajiro Jesure tuorũnurã, “Quenajaro”, yi ñucama mũare. Diore rũcubũorã ñari, “¿Ñati mua?” yicõri gãmeri mua jababare ãmoa yũ.

²¹ Yũmasiti, “Quenajaro”, yi uca ñuca yũ mũare.

²² No mani Ʋju Jesucristore maimena jeame ẽjũroju warã yirãji. Mani Ʋju ĩ tũdi ejare ãmosacõa yũ.

²³ Mani Ʋju Jesure senia yũ mũare queno ĩ yitoni.

²⁴ “Jesucristore tuorũnurã mua ñajare, mũare buto tuo maia yũ”, yi ñuca yũ mũare. Itocõ ña.

Dios Oca Tuti New Testament in Macuna

copyright © 2012 Wycliffe Bible Translators, Inc.

Language: Macuna

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Macuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06
